

臨四

平

記

集顏魯公
畫象贊字
光緒甲申
春仲錢塘
丁氏刊



序

臨平乃浙杭一鄉聚耳界于仁和海寧二縣其地有黃鶴白龍桐魚寶鼎之勝產靈育秀鬱爲名區子自戊寅首春應獻廷沈公之招命其幼子謙從予游朝嵐夕月瀹茗論文者四易寒暑遊屐所至竟日忘歸媿予潦倒不文無能一振山川之色甲申冬月以事至臨平謙且疏古事古詩稱臨平記其書自漢至元凡四卷曰事記二附記一詩一蒐剔甚難辨論亦博準之陳風信古之義良有取焉予故戲之曰男子始生以弧矢射四方否則研京鍊都昌大其文何乃局

臨平記序


一

於方域考核不出里巷對曰謙聞之先生矣修齊本於誠正不亦引而近之乎予無以應嗣後舟車南北會晤甚希今年以祝其母氏復來謙家里中諸公方謀剗剗此書僉以弁言見屬予遂樂而述其始末以見謙淹雅之才及諸公好義之篤東江文獻賴以弗亡苟充其用當未知其止而乃以割雞薄之亦予之失言也已

順治戊子新秋鹽官友祝文襄錦川氏撰

臨平圖

張爾嘉繪



臨平記卷之一

里人沈謙去矜氏輯撰

同里趙基宏元開氏較正
金漢趾振公氏

事記第一

後漢延熙至
宋宣和止

謙曰負才之子詭而譔爲海荒寥渺之書弔詭無稽使人驚怖而聞見或反蔽於鄉里亦可歎矣謙生於臨平春秋二十有五輿圖邊塞諸書咸劉覽焉及出門瞻顧而巷道徑庭亦有不辨其源委者每每自失因擇采舊文研幾古志編年紀事輯爲臨平一書自漢至元凡百有六則竊附論焉亦反約之意也然并畫拘虛夏蟲篤時負才之子必有起而笑者聽之矣

臨平記卷一

一

又曰謙作臨平事記而有慨焉夫臨平一鎮也僻在杭郡之東地不滿十里戶不滿萬人以視天下之大不幾稊米之在太倉乎欲紀其事而傳之蓋難矣然載在簡策勒諸金石者班班可攷也或灾祥有關於興亡忠邪乃係乎治亂乘輿之所至兵革之所加準之古法例皆得書至於浮屠之歲月特詳則循彼舊傳漫爲論列非

敢崇長異途有傷文獻也謙於此不無有遺憾焉

又曰京都之作類皆誇其山川美其風俗謙於臨平紀事蓋無去取焉善者固可率繇惡者亦資儆鑒臨平人固當知之天下人亦不外於是矣

又曰自後漢延熙迄亡元至正歷千餘年而得事止此可謂少矣然以一隅論較之他鎮猶靈著焉且記中可以爲勸誡者往往而有所謂一閱之市一卷之書覽者或能尋其說而不至鄙

臨平記卷一

二

夷也夫

又曰單寒之家縹帙不備險奧之地采訪未詳傳疑疏略誠不一而足矣後有志臨平者爲余補闕訂譌余厚幸也臨平厚幸也所謂糠粃在前用深慙慙耳

又曰漆園有言六合之外聖人存而不論六合之內聖人論而不議況鄉里之間孔子恂恂容置喙乎然感發興起不能無言每於事後筆記數語亦以自書其所見耳古云愚者千慮必有一得幸勿以謙顛愚而棄之可也

又曰謙誤此書經始於崇禎癸未三月告成於甲申十二月歲凡再閱稿用三更其間或困於疾厄或疲於亂離墨突孔席幾無一息之暇每當兵火倉卒中輒恐此稿散失乃於愁病之餘勉竣厥事故凡考訂論議卒多未備焉

又曰吾里郭太學紹孔家有書倉人稱學海年且七十矣與謙爲忘年友凡記中事蹟間賴訪求書成而志之固不欲貪其功尤不忍沒其才也

後漢後皇帝延熙十二年吳主權赤烏十二年夏六月吳寶鼎

臨平記卷一

三

出臨平湖吳志赤烏十二年六月戊戌寶鼎出臨平湖○郡事記事在吳赤烏十二

年十月

謙曰觀子華子之辨則黃帝之神鼎乃中和之喻也後世之主好高慕大侈爲祥瑞焉卽周王尙遷於洛邑漢帝猶見於汾陰況仲謀乎然考晉中興書曰神鼎者亂則藏於深山文明應運而至仲謀卽雄霸亦安知不爲孫氏哉然王孫滿對楚子曰在德不在鼎則又不能爲權解矣又曰按詩餘有寶鼎現題蓋取臨平湖事郭紹孔詞譜毛先舒填詞名解嘗引爲據南曲譜用

作引子名寶鼎兒誤

晉世祖咸寧元年吳臨平湖出石函吳主改明年為

天璽元年大赦吳郡志臨平湖邊得一石函中

餘刻其上作皇帝字孫皓於是改元為天璽元年

孫盛以為元皇中興之符徵五湖之石瑞也

○吳書於是改元大赦

謙曰印發改元一見於臨平再見於歷陽此吳

主信瑞之過也嗚呼上好禎祥亦何所不至哉

晉世祖咸寧二年秋八月吳臨平湖開綱目吳人或

臨平湖自漢末歲塞長老言湖塞天下亂湖開

天下平近者無故忽開此天下當太平青蓋入

洛之祥也吳主以問都尉陳訓對曰臣止能望

氣不能達湖之開塞退而告其友曰青蓋入洛

臨平記卷一

四

者銜壁之事也○晉書五行志吳孫皓天璽元

年吳郡臨平湖自漢末穢塞是時一夕忽開除

無草長老相傳此湖塞天下亂此

湖開天下平吳尋亡而九服為一

書法曰書譏也吳亡距此四年耳君臣上下方

以為祥焉下書晉加羊祜征南大將軍綱目之

垂戒深矣吳臨平湖開而吳亡陳臨平湖開而

陳滅卒不過三四年耳變不虛生信哉
發明曰孫皓淫刑亂殺罪浮於桀而湖開印發
誇以為瑞書之亦以著其狂悖不知滅亡之兆
云耳
田汝成西湖志餘曰杭城之水皆東北向而輪

委於臨平蓋地勢使然也水口浩散得皋亭山
爲之遮攔故氣脈不解又東北爲臨平山其下
爲臨平湖吳赤烏十二年寶鼎見湖中因稱鼎
湖又得小石刻皇帝字因改元天璽晉武帝時
占者謂臨平湖塞天下亂湖開天下平湖又杭
州王氣所關也

謙曰瑞應之事自古有之大要山崩河竭實爲
告凶葢塞開除允稱協氣鼎革之際必有所屬
易曰視履考祥當問其主德何如耳何致誣於
茲湖也

臨平記卷一

五

晉顯宗成皇帝咸和三年夏五月義興太守顧眾表

臨平范明爲參軍尋遣攻賊破之

晉書眾與虞潭將姚休遇

賊將張健戰敗還守紫壁時賊黨方銳義軍沮
退人咸勸眾過浙江眾曰不然保固紫壁可得
全錢唐以南五縣若越他境便爲寓軍控引無
所非長計也臨平人范明亦謂眾曰此地險要
可以制寇不可委也眾乃表明爲參軍明率宗
黨五百人合諸軍凡四千人復進討健健退於
阿曲

謙曰余讀晉書顧眾傳得臨平范參軍一人是
吾里人物之首也方眾之還守紫壁鮮有不勸
其渡江者而明獨不可其熟於經濟堅於斷決
與眾同智矣蘇峻之亂卒賴以平明固能副知

己之望眾亦遂食知人之報哉

安皇帝元興二年冬十月錢唐臨平湖水赤晉書元興二年

十月錢唐臨平湖水赤桓玄諷吳郡使言開除以爲己瑞俄而桓玄敗。錢唐記桓玄之難臨

平湖水色赤熒熒如丹

謙曰水變占曰水化爲血者好任殘賊殺戮不

辜所致也靈寶不自省悟止其逆謀而尙欲開

爲己瑞顛倒悖亂壹至是哉天子之賊卒爲馮

遷所殺徵也夫

十二月桓玄詐言臨平湖開卽皇帝位綱目玄表請歸藩使

帝作手詔固留之詐言錢唐臨平湖開江州甘露降使百僚集賀爲已受命之符。晉書玄謂

臨平記卷一

代謝之際宜有禎祥乃密令所在上臨平湖開

除清朗使眾官集賀矯詔曰靈瑞之事非所敢聞也斯誠相國至德故事爲之應太平之化於

是乎始六合同悅情何可言。綱目集覽錢唐臨平湖開錢唐今杭州是州北有大湖上有臨

平鎮卽其地也。一統志臨平湖在杭州府城東北六十里舊名鼎湖自漢末壅塞晉咸寧中

復開父老相傳云此湖開天下平故名臨平謙曰臨平瑞應歷有奇徵然有德者足當之耳

卽荒主恃之反以致敗豈詐稱惑眾而能長逞

逆亂哉其智出皓寶下矣

義熙十二年建華嚴院於臨平武林梵志廣嚴寺在臨平鎮西前

挹鼎湖後踞邱山水木清茂烟雲晦靄雜與岷廬賈區相接而喧囂不聞按圖志舊名華嚴院晉義熙十二年法師通所建以奉華嚴者

陳後主陳叔寶至德二年冬十一月臨平鎮沈爲湖御史胡敏請

建佛寺從之胡濙明因寺碑記臨平鎮距郡城東北五十餘里有尼寺曰明因按

宋咸淳志陳後主至德二年仲冬朔夜其鎮平

沈爲湖約方九里許居民驚駭郡以事聞後主

怪之欲命有司以民力實之御史胡敏奏稱陵

谷變遷乃氣運不嘗也世道失修或致虧損臣

聞西方聖人有無爲自治之道宜建梵刹募選

國中眞靜福厚女婦自願出家者若干人度爲

尼鎮壓之可也後主從其請遂命召選得二百

八十九人欽度爲尼仍敕冬官於鎮之西南崇

建寶利克日用成雕楹繡栢炫燿林谷金鈴寶

鐸應響霄漢玉毫金相崇奉如式緬以修垣蔭

以嘉木儼然成一化境敕賜寺額復給腴田二

十七頃內製金錦欄相袈裟莊嚴華麗示鎮山

門遠近聞者莫不望風瞻仰

眞可謂千載一遇之盛事也

謙曰臨平鎮平沈爲湖卽十月之詩所謂高岸

臨平記卷一

爲谷也而叔寶莫懲又欲驅民以傷力建寺以

傷財可哀也夫

又曰胡敏旣知世道失修而不輔君以正乃反

導以西方佛氏之事亦大謬矣厥後賣寺爲奴

敏實啟之也

禎明元年冬十一月陳臨平湖開綱目時江南妖異特

然自開陳主惡之乃自

賣於佛寺爲奴以厭之

書法曰書湖開何紀異也故吳臨平湖開而吳

亡陳臨平湖開而陳滅陳主不知修省自賣爲

奴則何益哉

發明曰孫皓丙申之歲臨平湖開綱目特書於冊至庚子歲而吳亡今陳以丁未之歲臨平湖又開至己酉歲而陳滅然則二國之亡乃天數當然非皓叔寶之罪也嗚呼曷不反而求之古乎夫桑穀生朝大戊以興飛雉鳴鼎高宗復古古人遇災而懼責躬修德故能反妖致祥豈以天數已定而遂置人事於不問之域乎向使叔寶因湖開之變痛自警飭擢用人材改紀其政嚴職邊備慄慄危懼若禍至之無日則亦未至遽爾滅亡夫何淫恣不已乃自賣於佛寺以厭

臨平記卷一

八

之天道果可以文欺哉綱目書此正所以著其不知恐懼之意耳不然自湖開之後陳主見之修省者果何如耶詩云畏天之威予時保之自古豈有不可回之天意哉

謙曰吳湖開而吳亡陳湖開而陳滅世遂疑湖開爲不祥矣然則父老之言何謂哉予謂不然蓋湖本靈奇時有眞主必先爲瑞應如殷周之甲子關兩姓之興亡者此爲晉武隋文而開非因皓與叔寶也而賣於佛寺爲奴事同景陽辱井雖云有計實乃無心矣

隋煬皇帝大業中臨平明因寺兵焚之胡濙明因寺碑記隋大業

中寺罹於兵燹無存

大業末臨平華嚴院燬武林梵刹志隋大業末燬於兵

謙曰煬帝荒游盜賊四起而史無臨平被兵之

文今按隋書大業九年秋七月餘杭劉元進兵

起相去百里寧無震驚二刹之焚想當其時也

臨平之民又一劫矣

唐高宗皇帝咸亨二年有龍鬪於臨平湖唐書褚無

近臨平湖湖中有龍鬪傾里開就觀之無量時年十三讀書晏然不動長精三禮史記後封舒國公○宋吳淑龍賦見臨平而無量靡觀○仁

臨平記卷一 九

和仁

謙曰金繩玉簡帝舜觀於河津以負圖昭瑞也

若玄黃鬪爭事涉駭變蝦蚺蠻觸何足覽焉無

量之不動同於子產之無求可謂知哉

中宗皇帝神龍元年臨平掘地得石像萬麻杭州府志像光湖在

臨平唐神龍元年湖有光掘地得彌勒石像乃建寺以像光為額且名其湖

謙曰執大象天下往蓋得諸氣象之間非石彌

勒之謂也武墜以陰邪盜神器斯臨平地有光

而掘得石佛也夫

景龍三年冬十一月帝祀南郊修文館學士臨平

褚無量諫皇后不宜助祭

唐書中宗將南郊皇

固爭以為周禮無后助祭之文惟漢有天

地合祭皇后參享事末代黷神不可為法

謙曰皇后亞獻之議發於祝欽明郭山暉蓋以

是時宮幃柄政假此獻諛為遷擢之地耳與宗

楚客之竝加尊號何異哉然履霜堅冰君子必

慎其始此無量所以據禮固爭也奈何庸主不

從卒致神龍毒餅之禍悲夫

玄宗明皇帝開元元年臨平褚無量晉左散騎常侍

唐書

兼國子祭酒封舒國公

趙基宏曰舒國名德崇高為唐代儒臣之冠志

十

臨平記卷一

稱故居在臨平湖側洵吾里之傑彥可不特書

表見哉

謙曰褚泰仕吳封臨平侯無量豈其苗裔耶厥

後曹信父子三世俱以武功顯於時臨平褚曹

皆能世濟其美者也

五年春正月太廟四室壞帝如東都左散騎常侍

臨平褚無量上言諫止行幸弗聽

綱目上將幸

四室壞上素服避殿以問宋璟蘇頲對曰陛下

三年之制未終遽爾行幸恐未契天心故災異

為戒愿且停之姚崇曰太廟屋材皆符堅時物

朽腐而壞適與行會何足異也百司供擬已備

不可失信但遷神主於太極殿更修太廟耳上

大喜從之命崇五日一朝入閣供奉恩禮更厚

有大政輒訪焉褚無量言隋文帝富有天下豈取符氏舊材以立太廟此特諛人之言願陛下克謹天戒納忠諫遠詔

諛上弗聽遂幸東都
謙曰太廟室壞災異之大者也詎可慢忽天威
遽從游幸況復禮制未終乎而崇以材朽適會
誣罔其君可嗤甚矣無量正色格非有古大臣
風惜哉其不用也

開元中臨平華嚴院僧玄覽請湖為放生池刺史

袁仁敬許之萬麻杭州府志請寺前平湖通洲為放生池。武林梵刹志唐高宗時玄覽法師始即其地而恢拓之鑄金銅像三百五十軀書金字涅槃經二千餘卷尊奉度置咸極莊嚴法師俗姓褚氏左散騎常侍舒國公無量之弟舒公少常讀書湖上有龍鬪之異既

臨平記卷一

士

顯以太夫人年高歸觀其鄉時從冠蓋出游山中敘昆季之好人以為榮法師因請湖為放生池刺史袁仁敬禁民六里不得入網罟司馬楊敏言復禁十里魚鳥涵泳士民嚮風遂為一方盛之

謙曰舒公勳德茂著而厥弟玄覽復為高座上
人共敘友于足稱榮樂乃至悲心憫殺惠及飛
潛亦盛舉也

八年春正月右散騎常侍兼國子祭酒舒國公臨

平褚無量卒唐書。仁和縣志卒年七十五詔曰無量朕師宜從優典贈禮部尚

書諡曰文

謙曰玄宗恤念老臣賜諡易名極為榮劭而蘇

頌致歎於徂輝哲人之萎故重傷之矣

二十二年皇后賜金重修臨平明因寺胡濙明因寺碑記開

元二十二年順天翊聖皇后聞陳后主故事賜金二十斤增置舊業煥然一新

謙曰明因為女冠所棲其教或通於國后賜金

二十宜哉獨怪叔寶金錦袈裟之賜可謂濫而

且惑矣

臨平華嚴院僧立覽卒武林梵刹志開元二十二年法師化去學士徐安貞

為之碑。鮮于樞遊記明日遍歷殿廡得立覽法師碑於東廡之下乃唐開元廿三年集賢學士徐安貞謨諫大夫褚廷誨書云師姓褚氏其先河南人食采錢唐因家焉師生而懸解從慧昶出家本邑有故隋華嚴寺乃師俗緣之地因成此院後改今名碑經焚燬今不可讀寺有

臨平記卷一

錄本遂得其詳

謙曰立覽為河南後人舒公昆弟雖托根右族

而結念上乘為吾里沙門之冠徐學士謨文褚

大夫書石量非溢美惜於元時便燬錄本蓋得

流傳至今誠足恨也

武宗皇帝會昌中臨平明因寺燬胡濙明因寺碑記會昌中燬天下寺

觀四萬餘所明因亦廢為瓦礫之區。按唐書乃會昌五年事

趙憲斌曰武宗燬寺四萬而明因與焉向之金

鈴繡栴者咸灰燼矣此無生之地尙不免於興

廢況市朝城闕必爭者哉所謂有形必壞也

臨平華嚴院燬

武林梵刹志會昌中寺燬碑亦湮沒

宣宗皇帝大中十二年陸同芳濬臨平華嚴院并得

石函

武林梵刹志大中十二年寓士陸同芳濬并得石函華嚴經六十一卷遂名華嚴井

捨宅為寺建塔以藏焉

謙曰函經投井發於同芳似有夙緣豈晉通法

師所遺邪遂至捨宅建標亦高曠士也

十四年春正月建寶幢於臨平

安平院寶幢碑記唐太宗庚辰正月

廿七日建勾當造幢陳丹都料弘農楊榮吳郡陸弘書鐫徵事即前行吉州廬陵縣尉張襲慶

一文千文前饒州主簿夏從師捨錢一千

謙曰按安隱寺在唐宣宗時名永興院吳越時

臨平記卷一

三

名安平院至宋治平二年始賜今名耳茲觀幢

碑列勾當都料等職此必敕建無疑第宣宗於

大中十三年已卯八月崩鄆王改明年庚辰為

咸通元年是為懿宗皇帝並無十四年之文金

石史書豈有謬誤者邪

懿宗皇帝咸通三年建法昌寺於臨平山北

成化杭州府志

謙曰自洪武二十四年立天下名利為叢林其

餘梵舍咸令歸併故陳善萬厓志所載止叢林

最詳其他列名而已此惟成化志最悉謙每託

書郵竟不可得獨廣嚴寺有摘抄者然亦止及

本寺今因其所見筆之他如安隱寶慶所併者
年月不可考矣尙俟覓全本以足之耳

僖宗皇帝乾符中臨平曹信起義兵

萬厓杭州府志
曹信臨平人唐

未盜起信乃糾集義兵以扞鄉邑乾符間杭州
募諸縣鄉兵各千人信與新城杜稜臨安董昌
錢唐劉孟安阮結富陽聞人宇鹽官徐及餘杭
凌文舉號八都後黃巢之亂杭之八都建派而
分者爲十三都
而信屢立戰功

謙曰唐末盜起信等舉八都之兵以保障東南
吾鄉之賴以免鋒鏑者信等之功也當與吳越
王並傳也夫

又曰臨平古稱重鎮凡鎮皆有屯軍故許村稱

臨平記卷一

古

寨他可類推矣惜兵制古不可考蓋肇見於唐
杭有八都臨平曹信其一也迨高宗南渡建都
於杭城外俱置戍壘臨平蓋爲要地德祐元年
元人果從此入而軍於皋亭焉入明建舖司於
安隱寺西每舖設兵船一兵四人有事則出哨
海門無事則駐防寇賊絕屯戍之擾得捍禦之
嚴誠良法也其近於臨平者有赤岸桐扣石目
蓮花諸舖今漸廢弛用老弱代役檣艣傾摧一
旦竊發恐制之無具可不慎哉

昭宗皇帝乾寧中臨平曹圭與族人師魯平嘉禾

萬厓

杭州府志圭為曹信之子將生信夢人謂已曰
我當為爾子有二千石圭少有膽勇乾寧中淮
人圍嘉禾圭與其族人師魯守之淮人望氣者
曰此雖孤城中有貴人不可圖也圭每與師魯
登城樓張樂縱飲矢石交至視之

梁太祖朱臨平曹圭平蘇州萬厓杭州府志開平中
晃開平中臨平曹圭平蘇州淮人復圍姑蘇屬正月

望夜師魯第盛陳燒燈之宴賊俘執者咸縱觀
之圭以浙西營田副使檢校太傅終於蘇州

謙曰鎮將子圭屢立奇蹟吳人世食其德利益

非淺也前有范明後有曹圭臨平何多名將哉

梁末帝朱瑱建臨平寶月庵仁和縣志
貞明元年

吳越王錢鏐建大安院於臨平山成化杭州府志○仁和縣

志在臨平山小林里

臨平記卷一

五

謙曰梁武手定天下而極佞佛佛圖澄一釋子

耳能斷決軍國扶獎後趙豈佛道有通於兵道

邪錢武肅強弩射潮為東南萬姓之保障而亦

喜建佛寺豈真佛道有通於兵道邪

唐明宗皇帝李春三月吳越王錢鏐卒子元瓘嗣以
嗣源長興三年

臨平曹仲達權知政事尋拜丞相萬厓杭州府志曹仲達圭

之子生於臨平室有紫光少小圭常節其飲食

雖嚴冬尚未挾纊品膳悉與僕隸等又日合運

璧圭在姑蘇與仲達求昏於睦州陳詢及將親

迎途由杭城錢鏐見而奇之以妹儷焉累授台
虞二州刺史元瓘襲封命仲達權知政事國建
拜丞相佐嗣元瓘仲達復攝政事時大賚諸軍
軍中有言不均者輒大譟舉仗不受賜諸將不
能制仲達諭之皆釋仗致拜仲達性仁厚好施

食不兼味元瓘重之呼丞相而不名卒諡安成

謙曰天生貴人必有瑞應此仲達生而臨平有紫光也嗣後豐功偉業為吳越之名臣豈偶然也哉

唐潞王李從珂清泰元年吳越王錢元瓘建安平寺於臨平山萬

杭州府志

二年吳越王錢元瓘建佛院於臨平桐扣山萬麻杭州府志

晉高祖皇帝石敬瑭天福三年吳越王錢元瓘建明覺院於臨平佛

日塢萬麻杭州府志

秋八月吳越王錢元瓘卒子弘佐嗣丞相臨平

臨平記卷一

六

曹仲達復攝政事萬麻杭州府志

周璉建恩平寺於臨平桐扣山成化杭州府志璉捨宅為寺

七年吳越王錢弘佐建佛日院於臨平桐扣山萬麻杭州府志

府志

武林梵刹志曰佛日寺在皋亭山北為明教嵩

禪師道場近桐扣寺前有渥洼池徑下有大松

四株皆唐宋舊物寺廢土人斫伐時見幞頭紅

袍者惶怖走避至今存萬麻間重建亦名佛日

塢溪流屈曲叢木交映水底怪竇如瑪瑙色細

蒲翠滴至此竟日忘返塢盡處有大洞如屋亦

仙境也

吳越王錢弘佐建眾善寺於臨平赤岸

仁和縣志

吳越王錢弘佐建顯惠菴於臨平桐扣

仁和縣志在桐扣黃

鶴山陽

謙曰按五代史後唐明宗長興三年武肅王錢

鏐卒子元瓘立晉高祖天福六年文穆王錢元

瓘卒子弘佐立則清泰元年二年當稱元瓘而

不當稱鏐天福七年又當稱弘佐而不當書元

瓘矣前志乃吳越王混書鏐豈長興之鬼復見

於天福邪今特按史一一分屬之

臨平記卷一

七

宋太祖皇帝乾德五年秋八月重修臨平寶幢

安平院寶

幢碑記乾德五年太歲丁卯八月中

太宗皇帝淳化三年改臨平法昌寺為壽寧院

成化杭州

府志

真宗皇帝大中祥符元年改臨平佛日院為淨慧寺

萬麻杭州府志

大中祥符間改臨平像光寺為吉祥寺

萬麻杭州府志

謙曰移鼎易社革命之事至於寺觀仍舊可也

多一改稱即亦多一營建虛費不必言亦甚非

桑門不二之意矣

天禧初金承來監臨平都酒務安平院寶幢碑記

○郭紹孔瓶山辨瓶山在臨平鎮廣嚴寺之側

小小一土阜耳宋時沽官酒處碎甓堆積久成

一阜其傍取土者猶時有瓶遺也俗稱

平山平當是瓶字秀水亦有瓶山可證

謙曰瓶山舊傳錢王犒軍於此壘瓶而成其說

近誕今以幢碑合之郭辨此為權酷之所無疑

矣

二年夏六月戊申重立臨平寶幢

安平院寶幢碑記重立寶幢年

月原此寶幢始自鉅唐大中十四年歲次庚辰

正月二日有七日眾緣於臨平市西長樂鄉界

永興院前建立泊乾德五年太歲丁卯八月中

為年久隳斜因修整而寡力致損動而傾摧日

月寢深五十餘稔今安平院住持沙門瑞明與

合院徒眾發心施長材移于舊基東二十步添

臨平記卷一

續層口載崇樹之葬古佛舍利口顯於龍柱海

山之下一俾其境域民安邇遠益謐無疆介社淨

祝鴻圖恭願人天常加翊衛功資動植利等宛

親若見若聞同臻覺岸時屬聖口口口天禧二

年六月戊申重立是日立秋勸緣郡城祥符寺

寶塔功德主內殿賜紫郡城臨壇賜紫紹澄僧

思忠臨平都酒務金承以上合施珍財嚴護舍

利葬此幢下右街圓鑿大師紹因清辨大師居

亮賜紫善慶僧慶餘願昭各施五百文入緣買

彩色嚴飾寶幢刻石郡人趙克和陶貞安平院

住持沙門瑞明

閣院徒弟記

謙曰真宗篤好符瑞而王欽若輩贊以封禪之

議甚至詭為降天書降聖祖復會道釋於天安

殿一萬三千八十六人可謂惑之甚矣其下承

風遂至移寶幢葬堅固闊眉大袖君人者可不

自嚴其舉動哉

仁宗皇帝康定元年夏四月翼拱之來游臨平山細

礪洞

按洞中題云翼拱之凌晨遊此時康定元年四月八日

謙曰吾鄉有細礪洞在臨平山巔深十餘丈闊二丈五尺高一丈五尺多出礪石本草所稱礪石出臨平者卽其地也至是者無不一遊自宋至今題名者數人而已然多漶漫不可讀而攀躋洗剔得此一人亦如空谷之足音蹙然而喜矣

又曰謙聞洞中題名舊矣向未見甲申四月八

臨平記卷一

九

日里人例有祈年之舉謙同友人往探因得見其真蹟字在洞中東北壁惟翼字最大下兩行分書之微有丹漆乃里人郭伯翼所潤色今則剝落殆盡其筆勢遒勁如顏真卿格真奇蹟也洞西南又鑿有竇緘二字無年月可考亦不解其義意者遊人有竇姓者邪至於滿洞鏤刻佛像或是楊髡靈鷲之餘波也

英宗皇帝治平元年重修臨平明因寺

胡濙明因寺碑記寺於治

平元年屢有祥光靈響眾募起復

二年改臨平大安院爲大慈院

成化杭州府志

改臨平安平寺爲安隱寺

萬麻杭州府志

改臨平眾善寺爲徧福寺

仁和縣志

治平中改臨平華嚴寺爲廣嚴寺

萬麻杭州府志

改臨平恩平寺爲淨信寺

成化杭州府志

謙曰厭故喜新余又於佛寺見之矣

神宗皇帝熙寧四年夏六月臨平佛日僧契嵩卒

燈傳

錄臨平佛日契嵩禪師徧參知識得法於洞山洎東還熙寧四年六月四日晨興寫偈曰後夜月初明吾今喜獨行不學大梅老貪隨麝鼠聲至中夜而化闍維不壞者五其頂骨出舍利紅白晶潔道俗合諸不壞葬於故居永安之左

趙基宏曰契嵩七歲出家十三得度十九遊方

臨平記卷一

三

慧朗研幾聿登真果至是西歸而五種不壞洵

奇矣哉

七年秋八月述古赴南都景達原叔子中子瞻會

別於臨平桐扣

鮮于樞遊記造方丈得東坡真蹟於法堂東壁云祖老入山之

十三日述古赴南都率景達原叔子中子瞻會別於此熙寧七年八月十二日字方四寸許

元豐間臨平佛日寺書藏經

鮮于樞遊記入藏殿觀元豐間所書經藏

有巨蛇不敢近者久矣

哲宗皇帝元祐元年夏六月楊無爲司馬才仲秦少

游入臨平佛日山謁天衣塔

鮮于樞遊記出藏殿得兩石於山門

之左乃楊無爲司馬才仲秦少游之詩揚云元祐元年六月十五日還自海上入佛日山淨慧

道場瞻禮懷禪師塔時長老彌公卽阿育王大
覺禪師之嗣道子出山酌甘泉而別因各留詩
楊則手書才仲少游
之詩皆范石湖追寫

謙曰佛日一梵刹耳得諸名士烏履之及便覺
左右生光況筆墨精妙附聲施於後世邪君子
之見榮於山川固如是也

又曰述古及無爲等皆字也今多不可考姑仍
舊文

紹聖二年翰林學士蔡卞請以臨平山佛院充功

德院

萬厯杭州府志賜
額曰勝因顯報院

謙曰立功立德不朽之事也古人勒銘封禪猶

臨平記卷一

三

有誇誕之譏况以佛院爲功德卞謬矣

又曰按是時卞以修仁宗實錄授翰林學士致
身清要而用意空虛眞季孫之旅秦矣無怪其
坦安石之牀託乘龍而假虎也

徽宗皇帝崇寧初妙湛禱雨有應剏院於臨平明因

寺居之

胡澗明因寺碑記崇寧初有妙
湛大師禱雨有應剏院居之

謙曰禱雨有應剏院居之禱有功也與漫建佛
寺者不同妙湛固足記也

四年帝御書一十二字賜臨平明因寺皇后亦書

三十二字並揭於華嚴寶閣

胡澗明因寺碑記
崇寧四年徽宗皇

帝御書守內真除外安修覺慧悟真如一十二
字恭聖仁烈皇后亦賜眾生自度佛不能度欲
正其心先誠其意無視無聽抱神以靜罪從
心生還從心滅三十二字並揭於華嚴寶閣

謙曰徽宗雅長於翰墨乃至御書賜寺明因榮
矣哉

崇寧中諡臨平佛日僧義懷傳燈錄懷禪師在佛

至吾行矣才曰師有何語示徒乃說偈曰紅日
掛扶桑寒雲封華嶽三更過鐵圍抄破驪龍角
才問卯塔已成如何是畢竟事懷舉拳示之遂
就寢推枕而寂塔全身於寺之東原崇寧中諡

振宗大師

謙曰嘗攷婦人有諡自周景王之穆后始匹夫
有諡自東海漢隱者始宦官自有諡自東漢之孫

臨平記卷一

三

程始蠻夷有諡自東漢之莎車始第不知浮屠
之諡起於何代今天衣得振宗之號亦榮矣哉

大觀四年夏五月殿中侍御史張克公以星變應

詔上言論太師蔡京修臨平山塔續綱目帝以

間合侍從自直言指陳闕失張克公論京輔政
入年權震海內輕賜予以蠹國用託爵祿以示
恩私役將作以葺居第用漕船以運花石名為
祝聖而修塔以壯臨平之山託言灌田而決水
以符興化之讖法名退逸門號朝京及不軌不
忠之罪凡數十事奏上貶京為太子少保出居

杭州

謙曰蔡京父準墓在臨平故修塔壯觀不意遂
入封事然京之朋奸誤國罪惡貫盈此特其一

耳徽宗逐之居外殊有敬天弭變之心奈何旋復召還太清之宴恩好愈篤卒致國滅身亡斯亦去惡不遠之過歟

宣和七年臨平湖水溢建妙華菴以厭之

仁和縣志龍興

寺在臨平鎮宋宣和七年因東湖水溢建菴鎮壓額名妙華併建普同塔一座

謙曰此踵陳主之智也然明因在西妙華在東豈陳宋二朝湖道亦稍徙邪

子聖旭聖昭聖普聖曜參較

臨平記卷之一終

臨平記卷一

三

臨平記卷之二

里人沈謙去矜氏輯撰

鮑懋芳芝蕃氏較正

趙憲斌尹施氏

事記第二宋建炎至元至正止

高宗皇帝建炎初臨平明因寺燬胡澹明因寺碑記高宗南渡燬於災

惟僧廬數楹而已邑人姚成首出己資率善信繕葺棟宇傾者起之圯者修之十未一二

臨平廣嚴寺燬武林梵刹志建炎罹兵燹其地沒為民居邑人姚成率好事者復之

謙曰按宋史是時陳通苗傅後先蹂躪吾里明因廣嚴之禍其能免邪

臨平記卷二

二年春三月扈從統制苗傅劉正彥遣其黨苗瑀

馬柔吉將赤心隊及王淵舊部曲駐臨平以拒

勤王之師宋鑑先是苗傅劉正彥作亂擁兵至行宮肆言謂帝不當即大位請隆祐

太后同聽政而立皇太子張浚報書於正彥曰自古言涉不順謂之指斥乘輿事涉不遜謂之

震驚宮闕廢立之事謂之大逆不道大逆不道者族今建炎皇帝不聞失德一旦遜位豈所宜

聞傅等得書而恐乃遣苗瑀馬柔吉將重兵拒臨平

謙曰二賊恃功怨賞遂圖逆謀令婦人及三歲

兒主之且欲挾帝幸徽越其將乘虛肆毒不言

可知曩微張浚之一書破膽趙氏蓋岌岌矣

張浚遣節制司參議官馮鞞至臨平間賊宋史初張浚欲

間賊念無可遣者夜分不寐浚客遂寧馮轡素負氣節聞之忼慨請行遂至臨平馬柔吉見之曰君尚敢來邪昨旦張侍郎有書來詞不委曲二公大怒且發兵出杭矣轡曰張公無他意大率欲歸正故不得不激切柔吉意少解夜二鼓柔吉與轡俱縋入城翌日與傅等議於軍中由是無他變

謙曰布衣重節義兵家重間諜是非識密鑿洞負氣敢死之人鮮不泄情敗事者如馮轡縋城之才誠不媿魯連蹈海之俠矣

又曰時賊方盤據上游自憑城社勤王者不計出精詳偵其虛實豈無投鼠之忌邪遂寧一往而義旅雲興便覺鼓勇百倍亦以老其師亦以

臨平記卷二

二

作我氣功在社稷固足稱也

夏四月張浚呂頤浩韓世忠敗賊將苗翊於臨平宋史頤浩諭諸將曰今雖反正賊猶握兵居內事若不濟必反以惡名加我翟義徐敬業可監也進次臨平苗翊馬柔吉負山阻水為陣中流植鹿角以梗行舟韓世忠舍舟力戰張浚劉光世繼之翊眾少卻世忠復舍馬操戈而行令將士曰今日當死以報國耳面不被數矢者皆斬於是士卒爭用命翊引神臂弓持滿以待世忠瞋目大呼挺刃突前翊眾辟易矢不及發遂敗走

謙曰臨平之去杭州六十里而近在趙宋則爲輦蹕之下可容酣睡乎善夫頤浩在內之慮也振肘腋而療膏肓是非浩等誰尸其功哉

又曰元人方萬里題韓王湖上騎驢圖有取日
虞淵戰臨平之句以世忠力戰除兇有戡定之
才也

又曰吾鄉山峙於北水繞於南迴環阨塞可以
制寇方今多難之時保障之事所宜講也而苗
劉誤用其術以圖逆謀河山有靈豈祐之哉所
以伏誅行在也黏牡養老之說可不早辨乎

建炎間改臨平佛院爲永慶院

萬麻杭州府志卽前清泰二年吳越

王元瓘所建

建臨平蓮花院

仁和縣志在臨平茅山下。萬麻杭州府志蓮花井在小林蓮花院

臨平記卷二

三

紹興初帝召臨平廣嚴寺僧淨作草書忤旨賜罷

鮮于樞遊記僧普聞大出書畫誇客中有淨師草聖四大幅圓熟有師法殊可喜聞之乃寺僧也紹興初嘗被召作草首書名花傾國兩相歡宋主不悅賜罷今錢唐人家所收稱王逸老合作者皆其書也

謙曰唐玄以華清而致西狩宋高戀錢唐而忘
北轅是誠千古所痛而當時臣宰皆苟安於處
堂厝火之餘曾無言及者僧淨乃以書諫旨微
矣哉不悅賜罷劉禪聽蜀伎真無情矣

六年帝改臨平妙華庵爲龍興寺

仁和縣志紹興六年高宗南渡

建都於杭以太后駕幸本寺賜額龍興

謙曰此必高宗迎太后韋氏幸臨平時也然幸臨平在十二年八月豈豫於六年賜額哉或歲次有小誤耳今姑仍縣志舊文

十年建臨平東嶽行祠仁和縣志

十二年秋八月徽宗皇帝顯肅皇后鄭氏及懿節

皇后邢氏之喪至臨平續綱目喪至帝易總服奉安龍德別宮○周草

窗奕辛雜志初徽欽葬五國城數遣使祈請於金人欲歸梓宮凡六七年而後許以梓宮返行

在高宗親至臨平奉迎易總服寓於龍德別宮一時朝野以爲大事諸公論功受賞費於官帑

者不賞

謙曰按綱目靖康帝於紹興二十六年六月卒

臨平記卷二

於金周氏並稱徽欽誤矣

帝至臨平迎皇太后續綱目太后韋氏至自金帝至臨平奉迎見后喜極而泣

后至臨安入居慈寧宮

謙曰高宗割地稱臣於金屈辱極矣然意在歸

梓宮還太后則請和受冊皆不獲已君子可以

重哀其志也親幸臨平牽衣一慟所謂天屬綴

人心也夫

又曰宋之與金不共戴天之讐也或以太后在

彼梓宮未還恐急則變生姑緩恢復之計勤祈

請之使誠爲得宜然自茲以後而不振如故亦

可羞矣比之漢祖分羹之智不啻霄壤矣乎

韓世忠詣臨平朝謁皇太后宋史紹興十二年顯仁皇后自金還世忠

詣臨平朝謁后在北方聞其名慰問者良久

謙曰斬王戰烈遐著北方皇后久為長城之賴

至是謁見深蒙慰問三顧頻煩兩朝開濟之意

參差無媿矣

三十年夏四月重立臨平寶幢安平院寶幢碑記

年建立寶幢乾德五年天禧二年重修紹興庚辰四月初五日重立所有勝利恭為祝延今上

皇帝聖壽無疆文武官寮同臻福利萬姓四民

永安富樂者山門監院僧師安助緣住持傳法

僧勝圓朝奉郎監臨安府臨平鎮稅兼煙火公

事李誠右朝奉郎行將作監丞趙復當府臨平

臨平記卷二

五

鎮崇奉三寶弟子宗慶妻朱氏十孃男仁寬媳

婦莊氏六孃孫女四三孃孫男州老五與家眷

等一力施財建立所有勝善廣大如法口口究

竟若虛空無向真如寂實莊嚴無上佛果菩提

無口口口廣資三有見存家者永保康寧嗣續

興隆仍薦亡公宗四郎婆湯氏孃子亡考宗二

郎妣馮九孃行上至高祖下及子孫乘此善根

往生淨土者右從事郎劉士熊施財建立追薦

故右中奉大夫祕閣修撰往生天界弟子姜宥

瓊妻張大孃男文超文浩文貴并弟子願實妻

諸七孃男堯宗舜舉及弟子陳元興男宗宥各

與家眷等口口請到佛牙舍利入口口緣永充供

成就無上佛果菩提者

謙曰寶幢規制雄秀鏤刻工巧且唐宋記載甚

詳惜久淪蔽頃與趙子尹施秉燭剔泥備錄登

記其荒滅斷剝者槩從闕疑辟若桃源舊民不

知魏晉覽之古色照人然榮落興亡致堪傷歎矣

是年李棫來監臨平鎮稅

安平院實幢碑記朝奉郎監臨安府臨平鎮稅

兼煙火公事李棫○萬麻杭州府志洪武十四

年定臨平稅課局錢鈔一十道該錢二千九百

千四樂十一年定臨平契本六十商稅門攤挑販魚

文永樂十一年定臨平稅課局商稅門攤挑販魚

課等鈔五十一千一百四十二錠二貫九百九十

定臨平河泊所魚戶等鈔四十八貫九百九十

三貫三百八十八文成化十年定橫塘臨平稅課

局稅辦課鈔一萬八千八百五十八錠一貫七

十課鈔一萬八千八百五十八錠一貫七

醋課鈔一萬八千八百五十八錠一貫七

十文折銀一萬八千八百五十八錠一貫七

四絲遇閏加鈔一十八兩九錢二分四釐四毫

二絲四忽內商稅鈔銀一百六十五兩七釐四

臨平記卷二

六

毫二絲遇閏加銀一十四兩九錢五分五釐一

毫九絲四忽里甲均平內帶徵銀二兩九錢七

錢七分六釐一毫二絲遇閏加銀一兩九錢七

分四釐三毫六絲○仁和縣屬之署有橫塘臨

平稅課局去東北六十里臨平鎮洪武十四

年建有河泊所在縣東六十里臨平鎮今革

謙曰臨平之有稅課局也其來舊矣考之幢碑

年月宋高宗時已有之然予謂天禧榷酤於鎮

爾時獨無稅局乎今并志洪永成萬四朝核實

歲鈔俾後來職此者知所遵守裕國通商予有

厚望焉

厚望焉

紹興間重建臨平淨信寺

成化杭州府志

孝宗皇帝乾道五年臨平廣嚴寺建佛閣鐘樓

武林梵刹

志僧行杲始營佛閣鐘樓

八年春二月周必大至臨平

周必大吳郡諸山錄乾道壬辰二月戊午

早冒雨行十里餘至桐扣行四里許至佛日山淨慧禪院晉臨平岸崩得石鼓張華以蜀中桐材刻為魚形扣之響聞數里即此地近世訛為桐口寺不經兵火面對黃鶴峯有清冷一擊等軒庫堂後有池池中有渥注泉出石罅中東坡嘗題五絕句所謂東麓雲根是也齋罷復登舟晚宿臨平

臨平

趙基宏曰佛日在桐扣所以收入臨平必大之

記可驗也而傳燈錄亦稱智才禪師住臨平之

佛日其附屬吾鄉亦久矣

謙曰桐口之名至今俗人皆稱之余嘗大笑其

臨平記卷二

七

謬今觀必大之紀其傳訛已非一日然嘗考之

字書扣亦音口則所傳又未必全訛但不當易

其字耳

清熙三年改臨平東嶽行祠為景靈觀

仁和縣志景星觀在

臨平鎮宋紹興十年建舊為東嶽行祠清熙二年移改是額。一統志景星觀在臨平山下與東嶽行祠峙立兩傍有藕花洲。按杭州府志作景靈觀

趙憲斌曰景星觀有丹竈丹井諸蹟相傳為潘

真人燒煉之所或云是邱長春皆未可知也今

東嶽廟在觀南地既與藕花洲遠於志有小異

耳

寧宗皇帝慶元元年冬十一月重修臨平石筧按石筧題

云慶元元年十一月十一日重修

謙曰管子有言溝瀆不遂於隘鄣水不安於藏國之貧也臨平鎮南有曹家渠者腴田數千畝去海僅數里屢受漂沒之患因於運河之底磬石為筧溢則洩於下河而田賴以有年初建不知何時雖有勒字漫滅不可考矣紀重修志勤民也

又曰臨平濱海故安隱寺西有白洋筧鎮南有赭山港豈鎮地古皆海邪如杭城前洋後洋之

臨平記卷二 八

稱若今俱為塵市耳涓涓之患可不早圖職在莅斯土者豫之而已

嘉泰中建承天宮於臨平赤岸仁和縣志寧宗御書承天宮三字為額

四年建月輪寺於臨平仁和縣志在黃鶴山陽

嘉定五年帝書普照二字賜臨平月輪寺仁和縣志

謙曰明君嘖笑不以假人況御札乎承天月輪重而寧宗輕矣

嘉定間請建寶慶院於臨平桐扣山萬厓杭州府志

謙曰請者何人不可考矣多事哉

理宗皇帝紹定三年冬十月築永和塘捍臨平湖許

和永和塘記運河有塘自帝都東北橋鎮薄吳

頭楚尾綿亘千餘里仁和首當其一郵遞輦運

幢幢旁午惟永和隄阻臨平湖白龍潭之險邛

風湍流夤夕鼓蕩一有線漏則膏腴數百頃瞬

刻就沒繫欲經久不拔是豈一日一人之力哉

邑有范任二君倡為義役肇始於紹定己丑之

春告成於是

歲良月之望

李旻濬治西湖說曰杭州穿城四河東南北城

下水門四處各有源委與西湖不通出城之外

乃合運河各河所受湖水及吳山諸源之水本

自有餘城東大河今名菜市河者本從海寧仁

和境上臨平湖而來一百二十五里入艮山水

臨平記卷二 九

門至城中斷河而止謂之上塘

謙曰按臨平湖在宋時波流浩大每見漂蕩而

運河百里尤輦運省覲之衝登疊永和豈非當

時之上務哉今湖水雖隘而大隄平直行者猶

賴焉范任之功詎可沒也

淳祐七年旱帝遣使詣臨平山白龍祠禱雨應禱

復遣使降香白龍祠碑記淳祐丁未以旱苦上

心焦灼靡神不崇特遣使詣祠下

寶祐五年雨帝遣使詣臨平山白龍祠禱晴尋應

禱命增剏一門以旌之白龍祠碑記寶祐丁巳

閔雨尤切復遣車騎馳

禱尋雨止上爲增
一門榜曰廣濟

六年春不雨帝遣使詣臨平山白龍祠禱雨應禱

白龍祠碑記明年春復不雨
上遣使諸祠拜禱復應禱

趙憲斌曰吳人積憂而成雨魯僖甚悅以致旱
災異固有關於事應也宋理宗時君臣日荒於
上民土日蹙於下而欲陰陽不紊玉燭長調不
可得矣乃仗龍神法力以回淫霖亢燥之災有
禱必通如扣鐘合券其燮理之功輔救特至豈
不賢於史賈輩哉

謙曰余考之西軒類書言吾鄉龍神事甚悉今

臨平記卷二

十

祠在山頂而祈禱多應靈感風雲恩敷兆庶固
不可載在祀典邪今乃臺殿傾欹甍蕭曠廢無
怪乎水旱之頻仍矣

又曰龍神應禱理宗特降香立門以旌之甚盛
典也然舊碑既剝而且斷幾於無字不可考矣
問之耆舊亦多不知甲申四月余同沈耳金治
臣姪至碑所洗剔摩挲屢得八十餘字其建碑
年月今亦無存然細觀碑尾隱隱有宮眷字疑
出自理宗御賜未可知也

開慶元年建寶林尼庵於臨平梅墅

仁和县志施
水接待庵

景定三年秋九月重修臨平石筧按石筧題云景定三年九月廿

五日重修

度宗皇帝咸淳九年建月華菴於臨平成化杭州府志俞氏捨地

建

恭宗皇帝德祐元年冬十一月丞相陳宜中檄浙西

制置使文天祥提兵勤王退守臨平鄭思肖心史湖州獨

松關陷於潛千秋關陷陳丞相檄浙西制置使文天祥提兵勤王退守臨平國勢危迫

謙曰文山忠孝性成當宋室顛危之日涕泣馳

義奮不顧身至於退守臨平亦孔棘矣大厦之

傾天祥卽糜體何救哉此所南紀之而有餘痛

臨平記卷二

十一

也

十二月吳君擢被命起太府少卿提點臨平民兵

宋史

謙曰賈似道陳宜中俱以蒙蔽釀亂遂至決裂

若此爾時卽盡驅臨平人爲兵亦何益哉

又曰稱民兵則未嘗教以兵法也不教而驅之

戰是驅之死也提點臨平民兵者知之不邪

元兵迫臨平浙西提刑徐道隆入援死之萬厯杭州府志

徐道隆字伯謙武康人爲浙西提刑權治安吉元兵之迫臨平也道隆入援死之

謙曰按史稱二年正月元伯顏駐皋亭道隆亦

於是月死難顧其入援在元年十二月元兵至臨平亦此時故書之

趙憲斌曰兵迫臨平已入畿甸君辱臣死道隆固當以身殉之然宜中以丞相而夜遁繼明以守將而乞降道隆真可謂忠矣此藏血千年當

化為碧也

元世祖皇帝至元三十年增修臨平石筓按石筓題云至元三

十年增修

成宗皇帝元貞元年夏四月鮮于樞遊臨平鮮于樞

貞元年四月廿日送客臨平鎮晨起買舟堰下出東新橋自皋亭山以北岸多野醪釀香氣酷

臨平記卷二

三

烈薰人欲醉晚宿廣嚴院僧普聞好奇喜客置酒西有樓下夜分乃罷明日遍歷殿廡得唐玄覽法師碑於東廡之下乃開元廿三年集賢學士徐安貞撰諫議大夫褚廷誨書云師姓褚氏其先河南人食采錢唐因家焉師生而懸解從慧飛出家本邑有故隋華嚴寺乃師俗緣之地因成此院後改今名碑經焚燬今不可讀寺有錄本遂得其詳僧又指伽藍神曰此玄覽法師之祖褚河南也是日行書過期未出普問者賁笥薦酒復飲故處大出書畫誇客中有淨師草聖四大幅圓熟有師法殊可喜問之乃寺僧也紹興初嘗被召作草首書名花傾國兩相歡宋主不悅賜罷今錢塘人家所收稱王逸老合作者皆其書也又東坡趙令燦唱和真迹一卷坡詩集中有之令燦有詩聲集不兼成斐章冀發來惟欲醉為鄉之句因道薄酒兼成斐章冀發笑也古人醉以酒蓋亦有所寓一飲百憂忘陶陶朝復暮公欲醉為鄉之句因道薄酒兼成斐章冀發錢濁醪安足酤敢竊好事名聊資子雲具巧手

斧鼻端此情知有素東坡和云伯堅惠玉膏兩
壺且枉佳篇次韻戲答神山無石髓生世悲暫
寓坐侍玉膏灑干載真且暮青州老從事高上
非所部惠然肯見從知我困市酷開瓶自洗盞
肴核誰與具門外聽剝啄烹魚得尺素伯堅又
詩云子瞻辭免起居之命令爍復用前詩之韻
一首以勉之登州與儀曹到官如旅寓螭陛鳳
皇池翱翔未云暮冰雪照人清黃色印中
如干日釀一宿陋清酤載筆無多辭公眞濟時
具歎息賀德基猶知我尸素自此次韻題其後
者一歎息賀德基猶知我尸素自此次韻題其後
立方陳之茂以子孫題者四人湯思退孫仲和葛
醇劉岑觀覽署名者十人陳相汪應辰鄭作肅
范彥輝芮燧徐慶凌景夏尹煊劉攽姚述堯最
後王明清題云英宗潛龍八月居穆親宅與宗
潛恭憲王游從厚善慶曆八年歲在戊子兩家
各生子同年日月時其後英宗入繼大統所誕
卽神宗既卽天位以是日爲同天節恭憲所育
迺太僕伯堅也爲本朝登進士第之冠易文階
最先子孫蕃衍世科相望聲華焜耀以至於今

臨平記卷二

三

五行之說其可不信哉僧云伯堅子孫今居臨
平貧不能自拔其卷別明年以粟易之其他無可
錄者是晚始與行者別明年以粟易之其他無可
佛日十里而近有寺曰淨慧山將還普聞曰此去
坡題名眞蹟不可不一到於是自下數里過黃
田塍轉郵場詰曲行香篆中如是者數里過黃
鶴山始平路漸廣峯巒秀拔林麓深邃夾道
清泉如奏琴筑是時小兩暫止雲日鮮潤四顧
闐然惟聞一琴鳥啼長松修竹問同行人出木
失謂眞在武陵桃花源也少東遙見飛閣出泉
末導者已云到山門矣乃揖蒼髯叟酌甘露泉
而後入時已破午羣僧皆在持覺老入城遂
徑造方丈得東坡眞蹟於法堂東壁云祖老入
山之方丈得東坡眞蹟於法堂東壁云祖老入
瞻會別於此熙寧七年八月十二日循東廡下
許又有榮公五絕句石刻詩見集
入庫堂觀渥注池泉玉色出東廡下
石陂陀半在水因公有不堪土肉埋山之麓未
放蒼龍浴渥注之句遂名回抵西廡入藏殿觀
元豐間所書經藏有巨蛇不敢近者久矣將出

得兩石於山門之左迺楊無爲司馬才仲秦少
游之詩楊云元祐元年六月十五日還自海上
入佛日山淨慧道場瞻禮懷禪師塔時長老彌
公卽阿育王大覺禪師之嗣道予出山酌甘泉
而別因留詩曰佛日山前水行人甘露杯須知
源派遠直自四明來才仲云水冷苔生暈風高
竹度涼道人何處去春色半滄浪少游云五里
喬松徑千年古道場泉聲與嵐影收拾入僧房
楊則手書才仲少游之詩皆范石湖追寫

謙曰伯機爲勝國名臣文采豐盛一時冠冕也
今觀此記詳瞻精核真有古作者風見榮吾鄉
文獻不少若得隨時劄記人人如鮮于臨平故
實豈寥寥若此邪前後分書以紀事此得全錄
其文用供素心者共欣賞耳

臨平記卷二

西

臨平廣嚴寺僧林受具戒 武林梵刹志元貞乙未
平山林禪師棄家於茲

受具戒徧參諸宿歷主名山藏揚宗
乘爲東南之倡由是寺之名益著

大德元年冬十二月朔重修臨平石笕 按石笕題
云大德元

年丁酉歲十二
月一日重修

謙曰吾鄉石笕自宋慶元元年一修景定三年
再修迨元至元三十年三修至此凡四修矣其
製法固奇祕而易壞是以屢煩整疊然自大德
至今凡三百六十餘年而堅好如故可謂良工
善事矣

又曰嘗考杭州府志壩開堰笕之在臨平者壩

則有施家梅潭

志稱海潭

葉家費仁閘則有臨平

即陡

門閘今有潘公閘及臨平湖四閘俱不載

小林大堰則有吳家笕則

有白洋石日鋪馮家河底石先賢之司蓄洩以備旱潦者甚至謙以為此非止畝畝溝洫之計而已豈以臨平去海甚邇虞其旦夕衝決民有淪溺之患乎今鎮南一望沙草接天諸笕閘故道亦就迷失誠恐海徙不常分殺無所則曲突之謀可不豫哉

七年臨平廣嚴寺增建佛殿

武林梵刹志僧如岳增建前殿而門廡稍

存其制

臨平記卷二

五

九年秋九月戊申重建臨平桂芳橋

按橋石題云大德乙巳無

射月戊申日庚辰時建

謙曰桂芳橋以宋徐太學兄弟三人同登進士而得名前此蓋名茅橋也事詳後附記中其起建年月無攷此重建也

又曰按橋今有二一東西者一南北者南北者則跨運河東西者塞矣舊傳橋未塞時下有閘瀉上河之水縈於鎮後故太學諸公聯翩並舉且冠多士後元時因河南民居漸盛謀建橋其上以渡之而東西者遂塞以為新橋之基閘亦

廢焉由是文風大減謙按南北固宜交通而上
下豈容隔絕非惑於青烏家言卽以水利論之
亦當疏暢而忌壅閼也在當日宜擇趙家衙對
赭山港處建立新橋而舊者仍之庶兩全矣天
啟丁卯余族祖明寰公倡義修之時余幼人亦
不議及此一仍前制今大工旣成豈敢輕論乎

大德間重修臨平壽寧院

成化杭
州府志

順帝至元初建迎峯菴於臨平山

成化杭
州府志

五年臨平沈密由賢良授四明市舶司提舉

臨平
沈氏

族譜字
謹之

臨平記卷二

共

六年春正月奎章閣學士夔夔序臨平沈密宗譜

臨平沈氏族譜至元六年
公修譜夔夔子山爲之序

甲辰元至正二年故宋貞白先生臨平沈友直卒

臨平

沈氏族譜字汝正生宋景定甲子仁慈孝友天
性自然入元不仕享年百有二歲諡貞白洪武
四年史官高啟爲
作傳誌諡曰完貞

謙曰貞白公爲予第十五代祖况高啟傳稱安

仁鄉而植節若此洵吾宗之望吾里之賢更讀

史官之諡傳眞見榮金玉義切典型矣

子聖旭聖昭聖普聖曜參較

臨平記卷之二終

臨平記卷之三

里人沈謙去矜氏輯撰

同里梅調鼎修子氏較正
潘雲亦夏珠氏

附記漢至元止

謙曰事記成而有事涉臨平無年月而僅存世系者凡四十六則棄之不忍稽古之艱混之又非紀年之例因別輯一編名曰附記仍以朝代論次焉

漢交趾太守姚俊藏蛻臨平錢塘縣志姚俊字翁仲受業太學明經術災異

臨平記卷三

晚為交趾太守漢末入增城山學道遇秦人郭幼平教服九精煉氣輔星在心之術道成在華陽洞兼河北司命主水官之考藏蛻臨平聞鼓角聲

謙曰翁仲術解靈立吐納真氣宜有霞舉之事乃其藏蛻臨平與邱丹同一神化矣

丁蘭母塚在臨平西湖志餘丁蘭故居在艮山門外三十六里名丁橋蘭事母至

孝母死刻木為像事之如生今有丁母塚在臨平桐扣山之東

謙曰丁蘭刻木謹事而木靈隣人忤木而怒殺其幽感義激誠孝之奇者也乃其母塚在桐扣

為護雷攀柏之地亦山川之榮矣

吳封褚泰為臨平侯萬麻杭州府志褚泰仕吳封臨平侯自幼仁厚政寬刑簡惠澤

及民後居錢唐爲郡著姓
歷六朝至唐代有顯者

謙曰臨平一隅之地而孫吳封侯於此是必食
祿民間設遇匪人流禍不淺矣幸秦之有惠政
以相及也古之遺愛吾黨其識之

又曰志云代有顯者清白之報也誰云廉吏不
可爲哉

晉臨平岸崩出石鼓

晉書吳郡臨平岸崩出一石鼓
搥之無聲帝以問張華華曰可

取蜀之桐材刻爲魚形扣之則
鳴矣於是如其言果聲聞數里

趙震曰石鼓出於臨平桐材長於西蜀風馬牛
不相及也何以擊之則鳴是非司空博物不能

臨平記卷三

二

知也華嘗辨龍肉悲鳧毛與此並爲奇驗愚以
臨平之鼓比豐山之鐘或不謬歟

謙曰按石鼓在桐扣山去臨平十里而晉書稱
臨平岸崩此古皆臨平山也後以得鼓易名要
知臨平原大而瓜剖豆分者多矣

又曰吾鄉石鼓一事最爲靈奇古人有引用之
者附記於此晉劉道民詩曰事有遠而合蜀桐
鳴吳石唐駱賓王螢火賦曰質殊而聲合者魚
形出而吳石鳴宋吳淑鼓賦曰聞臨平之擊石
桐賦曰擊臨平之石鼓石賦曰擊臨平而記異

宋葛澧錢唐賦曰如臨平山石鼓嘗出惟張華有言用蜀桐可擊其他用者必多惜未詳考不能盡載云

梅調鼎曰晉書張華傳曰臨平岸崩出石鼓又云聲聞數里劉敬叔異苑則云臨平岸山崩後又云音聞數十里此特句字之小異也若陳口口螢火賦云蜀有桐樹如魚形者出擊之則鳴則與傳之刻作魚形大相刺謬矣恐未必然駱賓王亦云魚形出而吳石鳴豈別有一說邪謹錄於此以俟博物者定焉

臨平記卷三

三

陶弘景稱越砥出臨平

陶弘景名醫別錄越砥今

器識云磨刀石李時珍綱目云羊肝石礪石解曰尚書荆州厥貢砥礪註云砥以細密爲名礪以粗礪爲稱俗稱砥爲羊肝石因形色也

龔信本草定衡曰越砥味甘無毒主目盲止痛除石瘡今細礪石出臨平者佳

謙曰越砥功可反明有金鑑之效爲歷代名醫所稱至今臨平山有細礪洞是其舊也余嘗枕流於安平漱石於細礪自謂謝鯤之過之幾忘孫楚之誤矣

又曰吾鄉物產自細礪之外則有曲竹出府志

薑出彙苑條桑出戴記皆見之書冊者其他甚多如非獨擅豈敢專屬此土也

後魏酈道元考注臨平湖

水經注異苑曰晉武時吳郡臨平岸崩出一石鼓

之無聲以問張華華曰可取蜀中桐材刻作魚形扣之則鳴矣於是如言聲聞數十里劉道民詩曰事有遠而合蜀桐鳴矣石傳言此湖漢末壅塞天下亂是湖開天下平孫皓天璽元年吳郡上言臨平湖自漢末穢塞今更開通又於湖邊得石函函中有小石青白色長四寸闊二寸餘刻作皇帝字於是改天冊為天璽元年孫盛以為元皇中興之符徵五湖之石瑞也錢唐記曰桓玄之難湖水赤色熒熒如丹湖水通浦陽江下注浙江名曰東江行旅所從以出浙江也

郭紹孔曰浦陽江在金華酈誤

謙曰漢桑欽作水經文字簡略道元綴輯羣書

臨平記卷三

以箋釋之洋洋大觀矣吾臨平惟湖最著今廣采博收可謂詳核而言湖通浦陽似亦太遠或

當時南北兩朝舟車隔絕善長豈未至吾地邪

酈道元稱浙江合臨平湖

水經注浙江一名浙江水出丹陽縣南巒中

又東北經建德州又北至新城縣東北至富陽縣又東北至錢唐縣又東經靈隱山山下自錢唐舊縣浙江經其南側有明聖湖又東合臨平湖又東經禦兒鄉又東經槎瀆而乃注於海

元裴伯宣浙江潮候圖說曰按桑欽水經云浙

江水出三天子都北過餘杭東入於海酈道元

注云浙江一名漸江水出丹陽黟縣南巒中又

東北經建德州又北至新城縣又東北過錢唐

縣此其說與今水道符合其云東經靈隱山下東合臨平湖又東經禦兒鄉又東經槎瀆注於海其說與今不合蓋槎瀆近皋亭山而海又在其東南相去甚遠非入海處也豈地勢移易而向之斥鹵漲成平陸耶

田汝成西湖游覽志曰所謂浙江合臨平湖經槎瀆以入於海者理或有之若西湖則自古不與江通也乃今江既不經臨平繞越州而東注而靈隱之南吳山之北斥鹵之地皆成民居而古蹟益不可考矣

臨平記卷三

五

謙曰漸江僻在東南道元生長西北水陸縱橫未易通曉然其指點鑿鑿亦似非荒唐杜撰者或出耆舊之傳聞或見輿圖之載記皆未可知若今則江未嘗合湖也嗟乎滄桑屢變陵谷再更我安能必道元之所稱非是乎

封臨平秦某爲王

沈祐重建硤石土穀神祠碑記

之季海甯硤石鎮土穀神祠苗父老張景庸氏部天瑞氏募於鄉卜吉鳩工以起廢爲己任不數月而告成功較前益壯麗神之主曰禹秦二王故老相傳謂禹秦神之姓王神之封號禹湖州烏程之紫林村人秦則本縣臨平人也同仕於東魏失其名與字并所以受封之故且不知何以廟食於此史籍不載後世無所考據不敢強贅云

謙曰余嘗至硤川謁秦王廟古柏森然爲一方之民社惜歲久湮沒無可考矣今見天用碣文如是因錄之

又曰謙按臨平鎮在唐時屬鹽官卽今海甯縣是也晉書稱錢唐臨平湖者乃郡名耳至五代梁龍德二年錢氏析錢唐鹽官置錢江縣臨平又爲錢江地至宋太平興國三年錢俶納土四年改錢江縣爲仁和縣而鎮又屬仁和今硤石爲海甯地而稱秦王爲本縣臨平人則可以知沿革矣

臨平記卷三

唐重建臨平華嚴寺有宋高僧傳其本邑有故華嚴寺之先瑩屬隋室不競法宇弛頽名將壑遷跡亦時廢屬於唐初募信人重建文明歲有敕許還舊額廣輪制度兼移基址背山臨水返遶形勝覽初以具戒依天竺次以僧錄往一閒居後以耆德統華嚴三寺次第同致於道無不在因教有遷也覽於開元二十二年示疾終於臨平所造寺壽八十有四

置臨平監

一統志臨平山下唐時置臨平監

謙曰宋臣張閻言錢唐江水泛溢壞鹽亭監地三十餘里豈臨平監亦鹽亭邪然山之去海甚遠似又非是一統志不言所職亦不能致辨耳

沈誠曰



疑也

褚無量故居在臨平

萬厓杭州府志在臨平湖側

謙曰史稱舒國鹽官人家近臨平湖側為臨平人無疑今其故址尙在湖曲康成通德亦當代所宜表式者也

臨平華嚴寺僧玄覽禮僧慧和為師

有宋高僧傳唐杭州華嚴

釋玄覽姓褚氏其先河南人食采於錢唐因是家焉覽誕膺明德生而懸解深達實相以崇善本自初念至於捨家師承慧和師德無不滿意用皆足年高行尊久為師範及見覽無一息之間違仁告門人曰無上之道清淨為本有能一念用其心吾未見學不足者江表無真僧久矣其或以此子為法鼓邪俾遐邇聞之其預為達匠之所甄異也如此

臨平記卷三

七

臨平褚無量廬墓

仁和縣志無量母喪廬墓鹿犯所植松柏無量號訴鹿不犯焉

無量亦終身不食鹿

謙曰舒國立朝克盡臣職又復號哀馴鹿孚及無知古稱求忠於孝洵不誣矣

臨平僧玄覽祀其祖褚遂良於華嚴寺

鮮于樞遊記僧又指

伽藍神曰此玄覽法師之祖褚河南也

謙曰玄覽為河南之孫因祀祖於寺其不惑於空桑無父之教亦沙門之特矣至今本寺伽藍猶稱褚相公云

臨平僧玄覽住荊州陟配寺

譚槩玄覽禪師性僻住荊州陟配寺張躁

於壁閒畫古松符載為贊章象為賦覽師怒曰何疥吾壁爾加堊焉

馮夢龍曰寺中留一古跡便啟後人遊覽之端貽擾不淺此僧大有遠識

謙曰名跡所存流連難去賦詩題畫亦名士之常苟其筆墨超羣尚恐求而不得玄覽惜未解

此

臨平褚無量請補葺內府諸書仁和縣志

陳善曰無量有功經籍非特擅藻詞林已也諤諤正言無所阿附姚崇諸人必多愧色賢於褚希明遠矣

臨平記卷三

八

杭州刺史白居易議決臨平湖錢塘湖石函記略

北有石函南有石笕凡放水溉田每減一寸可溉十五餘頃每一復時可溉五十餘頃自錢塘至鹽官界應溉夾官河田須放湖水入河從河入田脫或不足即更決臨平湖添注官河則有餘矣若官河乾淺但放湖水注河可以立通舟楫

謙曰錢塘之有西湖東湖雖關形勝亦切利民

香山所以議蓄決以為溉田通舟楫之用洵賢

守哉今臨平湖多為海沙所淤水勢大減所蓄

既少則取救何需故官河恆竭而湖田苦旱矣

經理之責不在當事者邪

又曰崇禎十七年夏臨平大旱湖水涸絕里人

揚州太守譽星夷陵別駕似車二徐公欲倡義
開濬而難於貯泥予勸其效東坡濬西湖法用
以築隄誠爲兩便迨所蓄既深漸次興復四閘
及東江故道誠盛舉也因著臨平湖考以勸其
成後以遭時多難不克竟其功云

臨平建鼎湖寺

武林梵剎志鼎湖寺去城東六十里在鼎湖中故名東湖大三千餘畝萬麻庚戌司道請復邑人虞淳熙爲倡構室以居僧海淵等更興崇殿宇以復其舊湖跨仁和海寧二邑與西湖南湖稱鼎峙焉

謙曰東湖之勝爲吾鄉之冠春秋佳日結伴閒
遊山色湖光遙遙相映建寺其中使遊者得以

臨平記卷三

九

息足誠盛舉也

臨平華嚴寺僧道光卒有雨花之異

有宋高僧傳唐釋道光姓

褚氏踰巖出家方冠受戒詣光州和尚學道卒時以五日曼陀羅華自天而雨

謙曰靈異所昭隨在而有亦視其人之何如耳
觀於雨花之異必其道行高潔有以致之歟勿
謂沙門中無人也

臨平山出曲竹

萬麻杭州府志唐邱員外隱於臨平山後羽化去棄杖於地生竹皆

曲可爲杖今安隱寺左右多有之

謙曰□□□□□□□□□□□□□□□□
□□□□物應人變理所恆有夫以狂奔之夸

父擲杖尚能爲鄧林豈羽化邱丹靈獨不生曲竹哉

潘雲赤曰丹所棲有黃犢嶺在臨平山之陽險仄高峻非杖不可上今曲竹遍於嶺下將令後人有濟勝之具乎

臨平佛日僧本空遊天台

傳燈錄佛日本空禪師初遊天台嘗曰如有人

奪得我機者即吾師矣尋謂雲居作禮問曰二龍爭珠誰是得者居曰卸卻業身來與子相見師曰業身已卸居曰珠在甚麼處師無對遂投誠入室時始年十三

鮑懋芳曰本空謁雲居一語投誠會心不遠年十三而穎悟若此真夙慧也白首不聞道壽而

臨平記卷三

十

愚亦何益哉

僧本空卯塔在臨平

傳燈錄師終於佛日卯塔存焉

錢鏐磨劍石在臨平山

萬厓杭州府志臨平山下有石舊傳錢王磨劍於此

郭紹孔曰劍池俗稱鑄鐘潭當塔院盛時鼓鞀於此亦未可知然池傍多細骼豈後作普同塔爲撒骨地乎

謙曰武肅時臨平曹信爲鎮將而鏐又與師魯善經略往來吾地必其熟道之處登高揮劍事或有之雖未得如龔遂之買牛朱雲之斬馬而提三尺安一隅亦匹夫之雄神物之助也

又曰張協太阿劍銘云太阿之劍世載其美淬以清波斂之越砥按越砥卽臨平細礪石正可當華陰拂拭之用想具美當年一日三摩挲劇于十五女其先采煥發足千圓象牛斗間嘗有紫氣也

曹信為臨平鎮將

萬麻杭州府志信歸歙歸杭為臨平鎮將

謙曰信既以八都舉義尋拜鎮將得展其保障之才臨平之民何幸也余嘗謂吳臨平侯褚泰唐臨平鎮將曹信皆有功德於茲土者當創一祠以祀之然非獨力可成俟與吾鄉之有高義

臨平記卷三

士

者共謀之耳

錢鏐稱臨平曹師魯為曹晏嬰

萬麻杭州府志曹師魯圭之族人形

短小而多智錢鏐嘗稱曰今之晏嬰人因號為曹晏嬰

謙曰昔舜短周公短子弓短俱為聖賢師魯與嬰童形童智所以為佳不然周饒靖人偃蹇碌碌寧得錢王之歎賞邪

宋臨平佛日僧契嵩上輔教篇等書下詔褒寵賜號

明教

傳燈錄佛日契嵩禪師得法於洞山世間經書章句不學而能作原教論十餘萬言

明儒釋之道一貫以抗宗韓排佛之說讀之者畏服著禪門定祖圖傳法正宗記輔教篇上仁

宗皇帝覽之嘉歎付傳法院編次入藏下詔褒寵賜號明教宰相韓琦大參歐陽修皆延見而

尊禮之

梅調鼎曰宗韓排佛自是正論契嵩撰原教論明儒釋之道一貫固善於自處其言亦廣大而可聽至是上書仁宗宜其嘉賞賜號也

祀白龍神祠於臨平山

西軒類書丁養浩曰吾鄉

山每山有水旱二龍洞超山二洞東南有臨平邱山旱洞在山之巔水洞在山之陰水洞特圓邃深沈大勝超山之洞超山石壁有鐫刻海雲二大字宋時俱在祀典今廢不舉不知始於何年超山乃黑龍神臨平乃白龍神臨平龍神其初有室女感電光而孕父母疑其私欲殺之女告故至大期父母醜之載以扁舟潛之臨平湖葦荻間俟其產一胞剖則一白蛇也女恚曰何物怪幾陷我舉杖欲斃之忽躍入水久之漸興雲雨駭動鄉里有異僧至曰此白龍神也持鉢孟

臨平記卷三

三

至水際祝之蛇乃從水躍入僧捧之陰窻之水洞從此靈驗大著雲興雨致之日自遠望之見白龍偃蹇山頂頭西尾東略與山齊雨止則沒其靈驗類皆如此今則不復見矣因筆記之萬麻杭州府志龍洞在臨平山自洞行至水際五丈闊一丈五尺高二丈三尺深其水不可測祈禱多應

謙曰白龍神事得丁方伯所劄記靈蹟始著夫龍神物也變化不測濟惠無窮若能感以至誠自當有求必應如享祀勸勤山川穢塞其能澤我乎

又曰舊傳吾鄉龍母姓沈氏其家去鎮二十餘里宗族甚繁至今祈禱必用沈氏之子乃應物

之有靈龍其最焉

通議葛某參臨平佛日僧契嵩

葛立方韻語陽秋余曾祖通議揚賓

登科未四十致政年八十七居江陰青陽之上湖自號草堂逸老參佛日僧契嵩遂悟真諦嘗與嵩云山禽嘯曉四時別林藪戰秋千里空又云我悟儻來空空世界師知休去忘形骸又與智林上人詩云色空了了空還執體相如如相亦非則知所得深矣

金漢趾曰通議年未四十即致政參禪亦澹懷

勇退之士味諸偈詠可謂赤水玄珠逢罔象矣

永安村改名亭子村

謙曰去臨平之北十里許曰永安村丁養浩有

言宋時有異僧至其地募資建亭於村之西以

臨平記卷三

三

便行人息足中設大士像頗著靈異人或遺物

於中有拾取者輒大疾里人神之而亭子以名

其說得諸故老傳聞當非誣罔至路有遺金人

不敢取謂非大士之靈其能若是乎

兵部尚書張閣言錢唐江出臨平議修築

宋史兵部尚書

張閣言臣昨守杭州聞錢唐江自永豐六年泛溢之後潮汐往來卒無寧歲而比年水勢稍改自海門過赭山即為薄巖門白石一帶北岸壞民田及鹽亭監地東西三十餘里南北二十餘里江東距仁和監止及三里北趨赤岸桐扣二里運河正出臨平下唐棲入蘇秀若失障禦恐他日數十里膏腴皆潰於江下塘田廬莫能自保運河中絕有害漕運等語

謙曰水經注稱浙江合臨平湖以今觀之未可

必而不知宋張閣亦言及之矣按湖去江不滿
十里志稱永樂十一年塘圯吾里溺死者甚多
田廬漂沒殆盡里人張子約作江圯歌以哀之
此可鑒矣是以歷代議修爲東南之要務云

僧道潛題臨平

萬麻杭州府志黃鶴山在桐扣山
西高三百丈寰宇記舊有黃鶴樓

有龍池一名渥注北塢有龍洞山之要又有黃
鶴仙洞石裂爲路外甚峻深杏而黑時樵牧有
藝松明而入愈行愈遠疑有龍在焉池出雲必
雨又臨平湖在鎮南長樂鄉週迴十里湖中有
白龍潭舊有龍王廟禱雨多應故老相傳但看
黃鶴山頂雲化作白龍潭上雨僧道潛之句也

謙曰黃鶴山在桐扣白龍潭在鼎湖出雲化雨

靈秀所鍾此參寥題臨平形勝之詩也土人傳

臨平記卷三

西

流遂以爲占候因未見其全篇不得入詩記故
見於此

楊傑參臨平佛日僧義懷

武林梵刹志楊傑字次
公元祐中爲侍郎自號

無爲子嘗歷參諸名宿晚從天衣懷禪
師遊懷每引龐居士機語令研究深造

僧智才迎其師義懷歸臨平佛日

傳燈錄天衣懷
禪師晚年以疾

居池陽杉山菴弟子智才
住臨平之佛日迎歸奉侍

宗婦曹夫人畫臨平藕花圖

西湖志餘參寥出家
智果寺其見知于東

坡也以臨平絕句宗婦曹
夫人者善丹青遂作
臨平藕花圖當時崇誦可知矣詩亦清新可賞

珍珠船曰參寥子秦少游友以契許嘗過臨平

道中作詩云風蒲獵獵弄輕柔欲立蜻蜓不自

由五月臨平山下路藕花無數滿汀洲東坡爲書刻石宗婦曹夫人善丹青作臨平藕花圖郭紹孔曰藕花洲當是白洋笕一絡蓋運河止水如杭城北濠例亦可種蓮

謙曰志云藕花洲在安隱寺右蓋因此事得名古佳麗之地也自參寥始奏風蒲獵獵之吟光弼亦著藕花紅白之句而薩天錫之咏昔人五月尤深感於古今一時詞翰蓋極盛矣而曹夫人又托之丹青寫照使翠蓋丹房宛然在目眞黃絹幼婦之筆也余嘗以臨平比輞川桃源不

臨平記卷三

五

盡謬哉

又曰臨平書畫之美蓋宋徽宗一十二字恭聖仁烈皇后三十二字及曹夫人藕花圖也于今不傳故應有叔夜廣陵之歎矣

蘇軾讀書臨平佛日山

佛日記事復有隱居石雲幻石玉蟾石依石爲向上

菴卽蘇文忠公讀書處

謙曰東坡倅杭與道榮善嘗往來此中名曰讀書處者榮君子之至也

蘇軾爲臨平佛日僧道榮換觀音偈

靈感觀音偈并引或問居

士佛無不在云何僧榮所嘗供養觀世音像獨稱靈感居士答言譬如靜夜天清無雲我目無

病未有舉頭而不見月今此畫像方其畫時工
適清淨又此僧榮方供養時乘心端嚴不入諸
相無有我人眾生壽者則觀世音廓然自現爾
時居士作此言已心開形解隨其所得而說偈
言夫物芸芸各升其英為天蒼蒼為日月星無
相不在容光則明矧我大士淵兮淨神妙湛生
光積光為形亭亭空中靡所倚憑眷此幻身如
鬼如坻生則圓物軒昂權衡地所不載而能空
行滅則蕩空附離四生不可控搏矧此亭亭涕
淚請救搏頰頓縷如月下照著心寒清不因修
為得法眼淨碎身
微塵莫報聖靈

金漢趾曰傳燈錄稱佛日明教禪師每夜頂戴
觀音像而誦其號必滿十萬乃寢其于大教可
謂勤矣道榮亦踵其故智圖形莊奉精神寂寞
有不靈感耶坡公此偈玄著幽通可謂現宰官

臨平記卷三

身而說法矣

天台僧思梵居臨平山蓮宗寶錄天台思梵講主
造教觀性相淵源每與士大夫往復隨有所問
答釋粲然一日有通判鄭公問曰教中所能念
阿彌陀佛教生淨土此專為鈍根方便若慧
根明悟一超直入佛地豈假佛地淨土耶師云
吾宗先達解此說云佛在世時文殊普賢寂滅
後馬鳴龍樹此上智者大師智覺禪師皆願往
生淨土應是鈍根乎若以此為鈍根將何為賢
耶昔孫莘老亦疑此淨土非聖人之權教是圓實之
遂息此疑信此淨土非聖人之權教是圓實之
真宗也能念彼佛必生淨土斯乃稱性實之言
非權教也

趙基宏曰古聖傳心止十六字何其簡也又不
聞一言終身者乎桑門原無多義阿彌陀佛便

足蓋諸部羣經豈得爲權教哉近日延恩僧行
化嘗謂余曰數劫之後三藏皆去惟阿彌陀佛
四字永久不壞亦似得天台之意矣

建圓通菴于臨平

武林梵刹志在鼎湖宋創元時燬

蔡準墓在臨平山

西湖志餘蔡京父準葬臨平山

行遂作塔山頂以浙江爲帶水以秦望爲礪山何其雄也然卒顛覆風水之道果作悲哉

謙曰人傑則地靈欲因地靈致人傑愚矣蔡京恃臨平形勝以恣其奸雄此所以卒致顛覆也
漸江秦望未嘗不可爲帶礪皆京自壞之使有德者卜牛眠安知不爲佳城萬年葱葱鬱鬱也

臨平記卷三

七

哉

又曰臨平有范明爲晉參軍褚無量爲唐右散騎常侍封舒國公曹信爲唐鎮將曹圭爲梁太傅曹仲達爲吳越丞相徐垓宋進士榜首且皆膚功大節照耀史冊盡繇山川之靈秀所鍾豈以蔡京奸敗而足爲山靈削色耶

又曰洪武初凡山川之有王氣者信國公湯和咸破壞之臨平則鑿斷其頸以山類駝形也繇是靈秀忽滅至無通人焉予嘗登峯周覽四方削成海門峙其左漸河環其右鼎湖古浸映照

其足昔人之意益深遠矣

丹陽葛澧賦臨平

錢唐賦如臨平山石鼓嘗出惟張華有言用蜀桐可擊天井開

兮涸溢葳增損龍洞闕矣源深不可測又曰湖則御息明聖陽陂臨平南上南下明星建盞又以顯祥得石湖邊以呈瑞

謙曰藝文志載葛澧錢唐賦累數萬言並綜核

典瞻京都而後斯堪軼駕內詠臨平三段因摘

出以見葛賦之必當傳吾鄉之附不朽也

許及之書臨平明因寺榜

陸友仁研北雜志許及之題臨平明因寺榜隸

法整秀如受禪表

謙曰及之諂事侂冑至于繇竇屈膝備諸醜態

臨平記卷三

六

時論鄙之雖有隸書之一長無足取也昔秦李

斯晉王羲之皆善書左相則謀祕沙邱卒痛深

上蔡右軍則恩流東土而譽擅山陰兩人同才

異報如此豈可因一藝之能而冀以自掩其過

乎

太學生臨平徐宣等上書攻賈似道

萬厓杭州府志臨平鎮桂

芳橋舊名茅橋因宋時里人徐宣與弟寅垓同太學數十人伏闕上書攻賈似道後同登進士垓居榜首鄉人號曰一門三秀更其橋曰桂芳

謙曰吾里固多奇節之士徐宣兄弟一太學生

耳敢于上書抵權相忠讜不必言其膽略亦什

伯于人矣然當時葉李蕭規俱以漳汀遠竄宣等亦必罹其禍者卒有三秀之榮其忠讜之報也高山止水吾黨其鑒而仰之

太學生臨平徐垓舉進士第一人

萬厓杭州府志徐垓以上舍舉

進士榜首其年月無考

謙曰太學兄弟並以高節見售而垓居第一爲尤榮焉昔陳垣攻彌遠而後登司業葉李蕭規亦以攻似道而遠竄後賈敗奉詔放還有洛陽橋贈詞一事而元祖亦甚重其名嘗徵用之高志亮節鮮有不報者獨陳東歐陽澈楊宏中呂

臨平記卷三

九

祖泰諸人刑戮放流奇冤異慘至今有餘痛耳

元故宋太僕趙令爍子孫居臨平

鮮于樞遊記又東坡趙令爍唱和真

蹟一卷僧云伯堅子孫今居臨平貧不能自拔其卷近年以粟易之

謙曰伯堅是宋宗室固派出天潢支分帝胄甚榮劭也俄而家亡社屋一變滄桑遂使其後亦降王孫而溷皂隸矣嗟乎豺狼在邑龍在野金鞭斷折九馬死子美之哀不獨興歎于延秋也

王蒙徙居臨平黃鶴山

仁和縣志王蒙字叔明本吳興人趙文敏甥後徙居

仁和黃鶴山素善畫山水人物其幽閒蕭散不減文敏風韻

謙曰黃鶴山人筆墨精妙爲藝苑所珍豈亦吾

鄉山水之助如杜少陵夔府後詩邪至夫品行卓絕肥遁不汙當與邱丹並傳矣

太師伯顏甥孫女撤入出家臨平明因寺胡漢明因寺碑

記元太師伯顏甥孫女名撤入者喜慕出家茲寺皇太后別迪助賜金三十斤綵段若干疋重立碑石輪奐再新有司檄舉嘉禾無相觀大師以主之

謙曰元主多崇佛教仁英二宗俱寫金字經順帝宮中讚佛亦舞十六天魔其下向風無不迷惑此撤入之所以出家明因也

沈聖治曰伯顏縱逆極矣以甥孫女之遠太后猶賜金段豈非權焰震赫所致哉臨平此時又

臨平記卷三

三

一騷擾矣

提舉徐文玉遷居臨平湖徐氏族譜字仲彬祖鼎為海鹽治栗尉因占籍

西門文玉贅于塔溪陳提舉女以忠信勤儉起家遂世居臨平湖側司空莊

謙曰提舉婿于塔村去臨平湖不數武山川靈秀所鍾宜其世科相望為東南鉅姓也語云近

澤黃河者澤九里於徐氏益信矣

沈之傑遷居臨平臨平沈氏族譜字奇英元末贅于臨平韓杲女生一子曰道安

遂家臨平之桂芳橋側

謙曰余作臨平沈氏譜以奇英公為第一代重始遷之祖也作臨平先朝事記而以奇英公終

者明余得作記之由也余得奇英而生臨平得
余而記追源溯本是役固當記矣

子聖旭聖昭聖普聖曜參較

臨平記卷之三終

臨平記卷三

三

臨平記卷之四

里人沈謙去矜氏輯撰

趙震雷門氏

同里

沈坊屑民則氏

潘雲赤夏珠氏

較正

姪聖治治臣氏

詩記

唐至元止

謙曰古人登高作賦雖以自見其才亦有形勝足以入咏者亦有古蹟足以致懷者非直以篇章之美自矜而已臨平舊事亦頗靈著往來遊

臨平記卷四

一

覽者諷吟必多謙自恨貧陋所藏詩集不備未能博收今僅以所見者自唐至元止得五十一首輯為一卷以朝代論次如事記焉然遺珠韞玉疏漏何辭若夫弋隱鉤玄當俟博學之君子耳

又曰先王令列國陳詩以省方俗之貞淫都鄙得失昭焉故咏歎之與記志並不可缺也謙今所輯雖屬管窺亦以備輶軒之采擇云

唐

蘇頌

字廷碩武功人官工部侍郎

送常侍舒公歸覲

朝聞講藝餘晨省拜恩初訓胄尊庠序榮親耀里閭
朱丹華轂送班白綺筵舒江上春流滿還應薦躍魚
謙曰褚公孝友性成是時以左散騎常侍兼國
子祭酒歸覲其親舉朝餞之又得廷碩贈詩足
稱榮樂矣

故右散騎常侍舒國公褚公挽歌

陽翟疏豐構臨平演慶源學筵尊授几儒服寵乘軒
審諭留中密開陳與上言祖輝一不惜空有賜東園
謙曰舒國旣亡世切典型之慕廷碩挽詞悲壯

臨平記卷四

二

切實真不媿有道碑文耳

陳章曰廷碩旣餞其歸復哀其逝此於友誼良
深篤矣比之歌驅挂劍之義無忝焉非諛詞夸
說所得而髣髴也

皇甫冉

字茂政丹陽
人官右補闕

臨平道中贈同舟人

遠山誰辨江南北長路空隨樹淺深流蕩飄颻此何
極惟應行客共知心

沈坊庠曰遠客親僮僕況同舟共濟者乎託以
知心宜矣然遠山滿目長路驚心一望中似有

渺渺之愁茫茫之歎正亦有情難遣耳

韋應物

京兆人官左司郎中蘇州刺史

送邱員外還臨平山居

長棲白雲表暫訪高齋宿遷辭郡邑喧歸泛松江淥
結茅隱蒼嶺伐薪響深谷同是山中人不知往來躅
靈芝非庭草遼鶴委池鶩終當署里門一表高陽族
重送邱二十二還臨平山居

歲中始再邁方來又解攜纔留野艇語已憶故山棲
幽澗人夜汲深林鳥長啼還持郡齋酒慰子霜露淒
送邱員外歸臨平山

臨平記卷四

三

郡閣始嘉宴青山憶舊居爲君量革履且願住籃輦
謙曰韋蘇州送邱員外一之不足二而三何其
殷且篤也觀其靈芝遼鶴之語其目員外幾同
天外真人矣

又曰臨平邱壑妍美山苦不深然崱光此中者
自邱丹而下代不乏人而李貞當靖難兵起以
湖廣道監察御史長蹈此山其忠節爲尤著也
今雖崇祀鹽官在吾里亦所當致享者謙每欲
卜地葺祠以奉漢孝子丁蘭吳臨平侯褚泰晉
參軍范明唐右散騎常侍兼國子祭酒舒國公

褚無量臨平鎮將曹信梁浙西營田副使檢校
太傅曹圭吳越丞相曹仲達宋尙書左僕射同
平章事兼知樞密院事呂頤浩少傅江淮安撫
使魏國公張浚知樞密院事蘄王韓世忠江東
宣撫使劉光世節制司參議官馮轡少保樞密
使信國公文天祥進士徐宣徐寅徐垓貞白先
生沈友直及丹貞凡十九人或以孝義或以忠
貞咸可爲後來所景企膺蕭之薦顧不當邪吾
黨好義之士倘有聞聲而襄力者乎

贈邱員外

臨平記卷四

四

高辭棄浮靡貞行表鄉閭未眞南宮拜聊偃東山居
大藩本多事日與文章疏每一睹之子高詠遂起予
宵晝方連宴煩悵亦頓祛格言雅誨闕善謔矜數餘
久跼思遊曠窮慘遇陽舒虎邱愜登眺吳門悵躊躇
方此戀攜手豈云還舊墟告諸吳子弟文學爲何如

其二

跡與孤雲遠心將野鶴俱那同石氏子每到府門趨
趙憲斌曰孤雲野鶴已極高人行徑以此贈言
洵非溢美也

秋夜寄邱二十二員外

懷君屬秋夜散步詠涼天山空松子落幽人應未眠
聽江笛送陸侍御同邱員外賦題

遠聽江上笛臨觴一送君還愁獨宿夜更向郡齋開
復理西齋寄邱員外

前歲理西齋得與君子同迨茲已一周悵望臨春風
始自疏林竹還復長榛叢端正良難久蕪穢易爲功
援斧開眾鬱如師啟羣蒙庭宇還清曠煩抱亦舒通
海隅雨雪霽春序風景融時物方如故懷賢思無窮
經無錫縣醉吟寄邱丹

客過無名姓扁舟繫柳陰窮秋南國淚殘日故鄉心

臨平記卷四

五

京洛衣塵在江湖酒病深何須覓陶令乘醉自橫琴
何氏語林曰韋蘇州性高潔嘗鮮食寡欲所在
焚香掃地而坐爲詩馳驟建安已還各得其風
韻惟顧況劉長卿邱丹秦系皎然之儔得厠賓
列與之酬唱

謙曰蘇州一代才名置身簪組而獨喜與高士
隱淪互相贈答真不媿雲中長者勾漏神仙矣

李端

爵里未詳

送邱丹歸江東

故山霜落後才子憶荆扉旅舍尋人到秋回逐雁歸

夢愁楓葉盡醉惜菊花稀肯學求名者經年未拂衣

崔峒官補

初除拾遺酬邱二十二見寄

江海久垂綸朝衣忽掛身丹墀初謁帝白髮免羞人
才媿文章士名當諫諍臣空餘薦賢力不敢負交親
金漢趾曰邱丹高隱確乎有不可拔之風崔峒
雖欲薦引我恐子陵不起元亮難求耳

送邱二十二之蘇州

積水與寒烟嘉禾路幾千孤猿啼海島羣雁起湖田
曾寄長沙什嘗聞大雅篇卻將封事去知爾愛閒眠

臨平記卷四

六

謙曰邱丹雖列隱淪實多文譽其所友善者有
韋應物李端劉長鄉顧況秦系皎然嚴維鮑防
謝良輔賈介范燈沈仲昌杜奕李清劉蕃鄭槩
陳元初樊珣呂渭范卷吳筠及峒俱一時之彥
相與酌唱流聲至今過於簪組之榮遠矣

邱丹

唐詩紀事曰邱丹臨平人○萬姓統譜曰唐

邱丹臨平人孔以無郡疑之考之前漢志臨平
事云臨平人孔以無郡疑之考之前漢志臨平
縣屬鉅鹿郡至唐為鎮州鼓城縣注云漢臨平
卜曲陽之地今真定府曲陽縣及晉州也丹唐
人不應仍書漢縣蓋紀事本不知所出以臨平
字誤之耳且邱丹與韋蘇州往還而云歸臨平
山居則非縣明甚詳其詩亦非作遠別者在唐
當是鹽官今為仁和人之無可疑者杭州府志已
載其詩孔居臨平山之陰仰止其人錄其詩惟

韋集及紀事數首外無錫蕭山二縣志各得一
首因并韋應物崔峒贈詩爲一帙俟博雅者附
益之○謙按漢桑欽水經云河水又東過平陰
縣北澗水從北來注之河水又東經河陽縣故
城南河水又逕臨平亭北又按後漢書明帝紀
云丁卯葬光武皇帝于原陵帝王紀曰原陵方
三百二十步高六丈在臨平亭東南去洛陽十
五里又按光武帝紀云建武四年夏四月丁巳
幸鄴已巳進幸臨平遣大司馬吳漢擊五較賊
於箕山大破之註曰臨平縣名屬鉅鹿郡故城
在今定府鼓城縣東南蓋臨平縣在鉅鹿郡臨
平亭在洛陽臨平鎮則在浙耳因前紹孔所考
未及故備錄之以資辨證云

奉酬韋使君送歸臨平山居之作

側聞郡守至偶乘黃犢出不別桃源人一見經累日
蟬鳴念秋稼蘭酌動離瑟臨水降麾幢野艇纔容膝

臨平記卷四

七

參差碧山路日送江帆疾涉海得驪珠棲梧慙鳳質
媿非鄭公里歸掃蒙龍室

沈坊盾曰麾幢野艇二句貴人高士行藏隱隱
寫出門如市心如市惟丹有之然蘇州亦非俗
吏也

奉酬重送歸臨平山

賣藥有時至自知往來疏遽辭池上酌新得山中書
步出芙蓉府歸乘鰲舩車猥蒙招隱作豈媿班生廬
謙曰邱丹隱于臨平山故有邱山之名所謂地
因人重也其清高之氣固足頰眎凡流而文筆

之佳亦不在蘇州以下後卒化去豈非仙才也哉

奉酬韋使君

久作烟霞客暫將簪組親還同褚伯玉入館忝州人
謙曰以下八詩題不涉臨平于例不當並見蓋
因邱丹集不行世采訪甚艱故不忍棄去并錄
附之

聽江笛送陸侍御同韋使君賦題

離樽聞夜笛寥亮入寒城月落車馬散悽惻主人情
奉酬韋使君秋夜寄示

臨平記卷四

八

露滴梧葉鳴風秋桂花發中有學仙侶吹簫弄山月
謙曰里中郭伯翼嘗建弄月臺于邱下蓋取丹
吹簫之句也其高致不減員外直堪競爽矣

湛長史草堂

身退謝名累道存嘉止足設醴降華旛掛冠守空谷
偶尋野外寺仰慕賢者躅不見昔簪裾猶有舊松竹
烟霞雖異世風韻如在矚余卽江海人歸轍青山曲
無錫縣志曰草堂在慧山宋司徒長史湛茂之
元嘉中結茅是山爲讀書之所今慧山寺是其
故址邱丹詩云云

謙曰邱丹高蹈略同茂之異苔同岑真臭味也
宜其稱述不置矣試以無錫之堂方之臨平之
嶺豈不清風竝扇芳躅比隆耶

登崇化寺塔

東晉許徵君西方彥上人坐時猶定見悟後了前因
靈塔多年古高僧苦行頻碑存纔記日藤老豈知春
車騎歸蕭詒雲林識許詢千秋不相見悟定是吾身
紹興府志曰蕭山祇園寺在縣西一百步晉咸
和六年許詢捨二宅建寺山陰者曰祇園此曰
崇化唐會昌中廢宋建隆元年重建有閣藏仁

臨平記卷四

九

宗御書後歸寶文閣治平三年改今額今爲習
儀之所唐邱丹詩云云

謙曰按宋沈仁衷感應塔記稱許徵君詢再世
爲梁嶽陽王蕭詒自曇彥上人許玄度來何暮
一語指示頓時徹悟遂捐俸營塔甚爲神奇故
丹詩隱括其事乃實錄也

狀江南十二月景十二詠

江南季冬天紅鱗大如鰠湖水龍爲鏡鑪峯氣作烟

憶長安十二詠

憶長安四月時南郊萬乘旌旗嘗酌玉卮更獻含桃

絲籠交馳芳草落花無限金張許史相隨

中元日鮑端公宅遇吳天師聯句

道流爲柱史教戒下真仙嚴維共契中元會初修內景

篇鮑防遊方依地僻卜室喜牆連謝良輔寶笥開金籙華

池漱玉泉杜奕怪龍隨羽翼青節降雲烟李清昔去遺丹

竈今來變海田劉蕃養形木二景蛻骨度千年謝良輔騎

竹投陂裏攜壺挂牖邊鄭槩洞中嘗入靜河上舊談玄

陳元初伊洛笙歌遠蓬壺日月偏樊琦青驪薊訓引白犬

伯陽牽邱丹法受相君後心存象帝先呂渭道成能縮地

功滿欲昇天范卷何意孤迷性含情戀數賢吳筠

臨平記卷四

十

唐詩紀事云鮑防代宗時以御史大夫歷福建

江西觀察呂渭大麻間爲浙西支使大麻末貶

歙州司馬觀十二月詩與中元聯句皆在江南

時事也咏江南憶長安其意可見矣

丁養浩曰近日臨平嘗有人酒色過度成疾命

術者請仙問之仙至書邱丹二字詩曰醉後頻

頻倚翠娥豈知精血暗消磨當初只怪恩情少

今日翻成怨恨多錦繡帳中生劒戟黃金釵底

動干戈玉山自倒難扶起縱有靈丹奈爾何詩

雖才鬼所託然亦有至理存焉

謙曰丁方伯西軒類書記邱丹降乩事然詩意淺俗非丹筆也聯附于此爲少年追愆者下一鍼砭耳

釋皎然

字清晝吳興人謝靈運十世孫

自義亭驛送李縱夜泊臨平東湖

長亭賓馭散歧路起悲風千里勤王事驅車明月中
寒生洞庭水夜度塞門鴻處處堪傷別歸來山更空
謙曰清晝爲靈運後人詩才俊潔卓有祖風乃
諷詠所及與玄覽參寥後先輝映茲土矣

張祐

字承吉南陽人以處士僑居丹陽一云交河人後知南海

臨平記卷四

十一

過臨平湖

三月平湖草欲齊綠楊分影入長隄田家起處鳥猶
吠酒客醒時謝豹啼山檻正當連葉渚水塍新築稻
秧畦人間漫說多歧路咫尺神仙路欲迷

謙曰按臨平湖今與山相去五里而祐曰山檻
正當蓮葉渚豈唐時湖水直至山下耶觀此則
與玄覽之請放生池說頗相合且舊志亦云臨
平山高六十丈周迴十八里其巔曰邱山以邱
丹得名上有龍洞天井旱未嘗涸下有東嶽廟
景靈觀龍王祠又下爲臨平湖此可證也蓋叔

寶湖開之時直至山前故方九里許若今則壅塞者也宋人許應和云仁和有鼎湖白龍潭之險古嘗以此爲畏地哉

許渾字仲晦丹陽人太和六年進士官至監察御史

與裴秀才自越西歸阻凍登邱山寺

春草越吳間心期旦夕還酒香聞客病詩境遇僧閒倚棹冰生浦登樓雪滿山東風不可待歸鬢坐來班陳章曰丹隱臨平故名邱山仲晦歸自越西而登之此爲臨平山無疑詩中述其凍旅雪舟倍極情致與後端明之尋尉烈同一雅懷也

臨平記卷四

十一

權德輿

字載之天水略陽人官至宰相

臨平湖夜泛

素彩皓通津孤舟入清曠已愛隔簾看還宜捲簾望隔簾捲簾當此時惆悵思君君不知

謙曰遊臨平湖莫美于夜泛月光靈爽水影淪漣置身其間真有鏡中天上之歎今讀載之此詩幽怨纏綿其有不形神俱往者乎

宋

蘇軾

字子瞻號東坡蜀人官學士諡文忠

雪後至臨平與柳子玉同至僧舍見陳尉烈

落帆古戍下積雪高如邱強邀詩老出疏髯散颼颼
僧房有宿火手足漸和柔靜士素寡言相對自忘憂
銅鑪擢烟穉石鼎浮霜漚我行雖有程坐穩且復留
大哉天地間此生得浮游

梅調鼎曰吾鄉每當雪後古澗流銀羣山立玉
風景清絕如家在畫圖中恨無麇陽春之侶耳
乃得蘇柳爲客尉烈爲主豈非此中一雅集耶
剡舟乘興差堪髣髴矣

過臨平次韻

餘杭門外葉飛秋尙記居人挽去舟一別臨平山上

臨平記卷四

三

塔五年雲夢澤南州淒涼楚些緣君發邂逅秦淮爲
子留寄謝西湖舊風月故應時許夢中遊

謙曰按此詩蘇集作次韻杭人裴惟甫而陳善
萬麻志作過臨平次韻或因其有一別之句也
今收之而述其所以收之意非敢濫也

又曰田汝成志餘云蔡京葬父準于臨平山因
作塔其上今按宋史大觀四年嘗奏京修塔合
之東坡一別之句可以知田說之謬矣相傳塔
毀于元末至今吾鄉舊宅階砌多是塔磚想亦
宋人也甲申四月余訪舊至塔基得斷磚一方

于宿莽中上有陽文吳甲二字此蓋陶人之姓名惜無年月可攷矣

題安平泉

聞說山根別有源撥雲尋徑興飄然鑿開海眼知何代種出菱花不記年煮茗僧誇甌泛雪煉丹人化骨成仙當時陸羽空收拾遺卻安平一片泉

謙曰東坡眞蹟舊藏于安隱寺中爲臨平墨寶夫何爲白氏所得不知所終矣余先兄道傳諱一先者博物好古悲其失真乃于崇禎三年集蘇字成詩勒石于泉上自跋以道意焉遊者每

臨平記卷四

古

爲稱快後十年化去余每覽碑輒爲墮淚阿兄風流頓盡矣

又曰近友人唐又尹以東坡平泉舊搨示余其詩句字微有小異欲重刻寺中附以後人之詩倘亦先兄興滅繼亡所同心也原詩附錄于左策杖徐徐步此山撥雲尋徑興飄然鑿開海眼知何代種出菱花不記年烹茗僧誇甌泛雪煉丹人化骨成仙當時陸羽空收拾遺卻安平一

片泉東坡居士賦

遊佛日寺

佛日知何處皋亭有路通鐘聞四十里門對兩三峯
題佛日山榮長老方丈詩

陶令思歸久未成遠公不出但聞名山中只有蒼髯
叟數里蕭蕭管送迎

其二

千株玉槩攬雲立一穗珠旒落鏡寒何處霜眉碧眼
客結爲三友冷相看

其三

東麓雲根露角牙細泉幽咽走金沙不堪土肉埋山
骨未放蒼龍浴渥洼

臨平記卷四

五

其四

食罷茶甌未要深清風一榻抵千金腹搖鼻息庭花
落還盡平生未足心

其五

日射迴廊午枕明水沈消盡碧烟橫山人睡覺無人
見只有飛蚊繞鬢鳴

謙曰坡公守杭民安物阜不特選勝于金牛爲
湖山之主卽城東山僻如臨平者五馬數過焉
觀諸題咏可見官清訟簡吾里享太平之福也

王安石

字介甫撫州臨川人官至宰相

榮上人遽欲歸以詩留之

道人傳業自天台千里蕭然赴感來梵行毗沙爲外
護法筵靈曜得重開已能爲我迂神足便可隨方長
聖胎肯顧北山如慧約與公西崦劇莓苔

謙曰道榮爲我地名僧當時蘇王最稱貴重而
多見禮接是必宗風朗徹諸公欲資其玄理也
豈若懷出債券妄希談地上事者哉

楊

傑

字次公號無
爲官侍郎

遊臨平佛日

佛日山前水行人甘露杯須知源派遠直自四明來

臨平記卷四

六

司馬標

字才仲官
錢唐幕官

遊臨平佛日

水冷苔生暈風高竹度涼道人何處去春色半滄浪

秦觀

字少游揚州人
官博士正字

遊臨平佛日

五里喬松徑千年古道場泉聲與嵐影收拾入僧房
謙曰此三詩余得之鮮于記中使樞詳已略人
則今日月愈遠興廢愈多必不傳矣善夫樞之
能不朽三人也然而臨平之詩以不遇樞而湮
沒者豈少耶

釋道潛

姓何氏號參寥於潛人出家智果寺

過臨平

風蒲獵獵弄輕柔欲立蜻蜓不自由五月臨平山下
路藕花無數滿汀洲

謙曰昔韓君平以春城無處而聲動禁中薛道衡以人歸落雁而名傾異域文章之美多致寵榮然落花庭草又不免爲筆墨之禍矣志餘稱參寥見知于東坡以臨平絕句則吾里固能爲兩人作緣而憐才者自獨有殷勤若渴之意故一見而稱知己也嗟乎道潛所嘗有盃有憐才

臨平記卷四

七

如軾者哉

趙憲斌曰後以參寥此詩名其洲爲藕花洲去子家不數武家君嘗倩構李項聖謨繪圖以復曹氏之舊但今洲中止有颿檣出沒絕無若耶太華之觀每欲爲文檄諸好事者補種藕花庶幾風流不墮舊遊可續也

汪藻

字彥章饒州德興人官至兵部侍郎

過臨平

一別九霄路風煙長滿衣已成身老大無復世輕肥
天闊鳥雙下山寒人獨歸曉來何處雨春水半巖扉

其二

睡起涼生岸鉤簾坐小窗
麥風能起柸梅雨不鳴江
往事心長折歸途影自雙
依然蒲柳地人老故先降

林次麟

爵里未詳

曲竹

直節稜稜是此君子孫
卻以曲爲名首陽山下知難
種只可斜封向管城

謙曰曲竹乃邱仙靈蹟蓋因杖曲而化竹亦曲也誠不可以曲直論次麟此詩若不識丹事者嗟乎豈知臨平高躅正堪彷彿首陽乎

臨平記卷四

六

又曰林君系宋人而爵里無攷按宋史寧宗廟有太學生曰林仲麟嘗與楊宏中等六人上書訟趙汝愚求竄李沐者豈是此人乎記此以俟博雅者定之

呂絃

爵里未詳

登黃犢嶺

疇昔聞高隱紅塵隔遠林
閒乘黃犢出踏破白雲深
謙曰韋蘇州送邱丹詩云結茅隱蒼嶺蓋丹嘗隱于是嶺好乘黃犢出入故得名此云疇昔聞高隱者乃懷古之作也至閒乘黃犢出已全用

邱句矣

沈汝諧

杭州人大觀三年進士

題冰谷泉

磬石纔深數尺餘一泓清冷若冰壺泉源定與安平接二水輕甘味頗如

沈坊肩曰冰谷之名最佳而味亦不下于安平總之山南者飲安平山北者酌冰谷使家裕而戶給山靈亦巧哉

謙曰此泉久爲泥淖自郭太學伯翼始珍之建山舟于其上而泉名爛矣太學眞泉之知己也

臨平記卷四

九

釋圓志

號松堂長靈守卓禪師之法嗣

安平寺寶幢詩

高顯人天無數幢微口口土露堂堂空中常現口口相雲外長舒百寶光諸佛護持何日朽羣靈協贊共時昌塵勞無限未歸客回首親瞻正法王

謙曰松堂老僧爲禪林尊宿此詩鏤刻幢碑惜歲久剝落特爲錄出而闕其疑俟覓舊搨以足成之耳

元

薩都刺

字天錫雁門人舉泰定間進士

過臨平

昔人五月臨平路汀洲藕花滿無數此來三月過臨平雪白楊花捲波去楊花捲盡藕花開今人古人俱到來欲向山陰尋賀老酒船到處且徘徊

謙曰讀天錫此詩隱然有今昔之感此余所以不忍多諷咏也噫千載而下亦將有感于余言又曰道潛云五月藕花天錫云三月楊花此必洲隄之上遍植高柳者而張祐過臨平湖詩亦云綠楊分影入長隄謙疑湖水直至山下而藕花洲卽湖之一角也是時繫馬柳枝蕩舟蓮葉

臨平記卷四

三

紫騮青翰迴通于湖光山翠間佳麗當不減明聖何以今日絕無點綴之人而以寂寂自笑哉

張光弼

廬陵人官至浙省左司員外郎

過臨平湖

船過臨平欲住難藕花紅白水雲間只因一霎溟濛雨不得分明看好山

又曰按陳善萬厯志佛日寺附宋范大成一詩謙詳其詞有帆掠楓橋之句似歸蘇州所作此豈善有所悞耶因不敢收附記于此

附詞

宋

趙長卿

號仙源南豐宗室有惜春樂府

春景

卜算子

春水滿江南三月多芳草幽鳥銜將遠恨來一一都
啼了不學鴛鴦老回首臨平道一道長眉似遠山
山不似長眉好

蘇軾

爵里見前

送述古

南鄉子。謙按陳襄子述古福州人知杭州

回首亂山橫不見居人只見城誰似臨平山上塔亭
亭迎客西來送客行臨路晚風清一枕初寒夢不

臨平記卷四

三

成今夜殘燈斜照處熒熒秋雨晴時淚不晴

謙曰填詞雅格先哲不廢謙徧搜古詞涉臨平
者止卜算南鄉二調遂附見于詩記云

子聖旭聖昭聖普聖曜參較

臨平記卷之四終

臨平記附錄

里人沈謙去矜氏考注

同里潘雲赤夏珠氏編次

徵臨平三十詠啟

東江沈謙去矜

粵稽臨平鎮者應斗極之分星鎮錢唐之左翼扣石
刻桐表靈奇於張氏發函出鼎徵治忽於孫吳雖憑
江海之雄本饒巖壑之美在昔輶軒遠屆時有徵求
適軸幽棲每多寤詠故爾清音不斷往牒長留旣積
玉以交光已懷鉛而博采矣然而文思日異風景不
殊解登高而作賦何讓古人卽望遠以當歸亦憐羈

臨平記附錄

一

客暇日銷憂窮謝靈運遊山之興當春散藻竭左太
沖鍊都之才惟爾探玄庶乎振綺況輞水著因中允
奚俟畫圖赤城顯自興公駭聞金石固篇章之足貴
卽今古而何殊茲謙不揣昏頑妄希教益詳研古志
廣檄新聲若撫境以緣情何煩夢想卽聞風而染翰
可當臥遊將藉不朽於曲刀永賴傳神於鉅筆爾其
景不盡收尙識良馬於驪黃之外題多剩義善聽清
琴於山水之間儻得綠字烏闌鴻文虎變何止蜚英
聲於下里則亦踵芳躅於前賢矣謹啟

臨平三十詠

安平泉

仁和孫穎枝幼舍

在鎮西二里安隱寺前宋蘇軾有詩其東為檀泉又東為孟姜泉

禮佛遵幽徑尋僧探古源
水花交夜靜山雨入秋喧
浩影澄雙樹流光布獨園
一泓堪洗耳終日聽潺湲

黃犢嶺

里人郎駒季午

在鎮西二里安隱寺後唐邱丹隱此嘗乘黃犢出入因名宋呂絃有詩嶺上為般若菴

昔人乘犢去遺嶺白雲封
蘿黑千盤雨風喧萬壑松
古祠鳴伏翼陰洞蟄蟠龍
倚杖燒丹地神仙可再逢

劍池

里人羅吉臣敬叔

在鎮西臨平山上舊傳吳越王錢鏐磨劍於此

臨平記附錄

二

古池餘劍彩故老說錢王
不見風雷吼空悲草樹芳
清泉秋鬢沸紫氣夜蒼茫
霸氣今何在登臨幾斷腸

甘露泉

里人金漢趾振公

在鎮西十里佛日寺前宋楊無為有詩

佛日山中寺門橫一片泉
揭雲光映紫和玉飲逾鮮
徑曲蟻衣古松深石骨堅
那知天上澤幻出佐談禪

讀書堆

錢唐程霖雨三

在鎮東南五里臨平湖中唐舒國公褚無量讀書處也咸亨二年湖中有龍鬪傾城往觀無量時年十三讀書晏然不動長精三禮史記堆上舊有臺今廢其下為白龍潭即宋室

女產龍處

褚氏千年後蕭條烟雨中春風餘苜蓿秋月落梧桐
龍吼吞孤渚螢飛昭碧空揣摩當日事異代不相同

永和塘

里人姚永昌 璽文

在鎮中運河上以阻臨平湖白龍潭之險宋紹定三年築許應和有記

憑藉蠲湖患兼之塞白龍如弦互南瀆相枕越邱峰
蹀躞方行旅推遷幾栢松孰矜徭役苦諮及築時供

寶幢

里人沈誠羽階

在鎮西二里安隱寺前唐大中末建宋天禧二年移葬佛舍利於龍柱海山之下紹興三十二年重立隄上今有茶亭其東為許家莊多楓林

李唐開勝蹟迴立自蒼蒼鳥跡千年祕龍文五色光

臨平記附錄

三

風雲迷紫翠日月露微茫燈繼昏衢耀靈標照十方

埕基

里人范暹 若干

在鎮西臨平山巔宋蔡京父準葬此山為駝形負重能行故作埕山頂元時燬其西為信國公湯和所鑿處

金輪經廢久遺趾益淒淒石古蒼雲沒臺高宿莽齊

江山鬱自抱風雨過嘗低安得標重建攀蘿聽鳥啼

渥洼泉

里人沈謙 去矜

在鎮西十里佛日山淨慧寺庫堂後出石罅中宋蘇軾有詩

卓錫飛泉坼幽幽百尺深赤厓春湧樹青葛晝藏陰

乳滑嘗沾潤源高詎易尋神靈意莫測雲霧一龍吟

大安寺

里人沈聖治治臣

在鎮北五里梁貞明元年吳越王錢鏐建

寶所開吳越蕭森古木封到門通曲徑當殿削諸峯
生計分蜂蜜禪心見虎踪殘碑雖在眼霸業可重逢

景星觀

里人徐仁振敬昭

在鎮北一里宋紹興十年建舊為東嶽行祠
清熙二年改今額觀前有丹井丹竈諸蹟

漠漠古雲關千秋鎖碧山吹簫人不見燒藥竈常閒
苔澗多龍臥松巢有鶴還黃昏拱星斗虛照石壇間

淨慧寺

海鹽沈相如叔度

在鎮西十里黃鶴山北後晉天福七年吳越
王錢弘佐建名佛日院宋大中祥符元年改

臨平記附錄

四

今額其東為龍樹庵

寶地開山古羣峯繞徑齊錫飛黃鶴近花散白雲迷
鯨吼驚秋閣龍歸過晚溪重崖翳石鼓欲問草萋萋

石窠

里人鮑懋芳芝山

在鎮中西茅橋南甃石於運河之下以洩曹
家渠之水注于下河不知建自何代宋慶元
元年景定三年元至元三
十年大德元年俱重建

甃石青苔古喧喧萬井前腴饒喜今日疏鑿定何年
曲水穿河黑崇隄障海偏沿流楓盡赤落照淡人烟

像光湖

里人趙憲斌尹施

在鎮西五里唐神龍元年湖有光掘地得
彌勒石像乃建寺以像光為額且名其湖

臨湖開寶地光怪憶神龍氣白吞吳雨波深倒越峯
漁人間鼓檝鹿女坐鳴鐘秋漲年年闊丹青古殿重

明因寺

里人王之賓 赤周

在鎮中西茅橋南陳後主至德二年臨平鎮沈為湖後主惡之御史胡敏請建以厭水災尼寺也寺有宋徽宗敕賜御書一十二字恭聖仁烈皇后三十二字

地得優婆勝名因後主傳洗妝鳴玉磬施鏡禮金仙

笕落花隨逝垣頽月自懸六朝餘綺麗臨眺欲潛然

冰谷泉

里人郭孝寬 西韋

在鎮西北三里安山下宋人沈汝諧有詩萬麻中郭氏建亭于泉側名山舟傍有冰泉菴

憶昔留泉石何年草莽侵響隨清澗落源共白雲深

臨平記附錄

五

竹靜涵朝翠松高覆夕陰不須愁寂寞幽意托孤岑

安隱寺

里人徐忠振 格王

在鎮西二里臨平山南唐清泰元年吳越王錢元瓘建名安平舊名永興宋治平二年改今額其東為一清慧空日炤大慈等菴西為圓教寺象光寺南為掃花居為段家浜植梅之所

何年安隱寺遺蹟翠微前苔色牆頭字松聲戶外泉

巖林藏寶地山殿鎖秋烟卻喜囂塵寂端居忘世緣

細礪洞

里人呂明德 福持

白龍祠碑記宋淳祐七年丁未以旱苦上心焦灼無神不崇特遣使詣祠下禱雨少頃甘澤大降上甚靈之復使降香明年春復不雨上遣使詣祠拜禱復應又考西軒類書丁養

浩曰臨平龍神每遇旱祈禱輒應官吏耆老詣洞拜祝投牒即水涸盤旋牒沒入信宿輒大雨或間數歲再詣沈牒則前歲之牒輒自水中出畧無所損養浩之說如此亦可異也

在鎮西臨平山巔俗名旱洞洞出細礪石梁陶弘景名醫別錄曰越砥今細礪石也出臨平即此內有宋人翼拱之題名石刻里人例於四月八日占年於此多驗其後為龍洞為天井旱未嘗涸

洞戶何深杳幽尋絕世氛蛇盤嘗起霧佛古自生雲採藥春應駐攀蘿日未曛不須求赤土越砥試龍文

向上菴 里人唐宏基子翼

在鎮西十里佛日寺宋蘇軾讀書處

妙理原無上追趨達者情結廬塵絕點跌坐觀三生

臨平記附錄 六

雲映虛潭靜花隨樵路平偶然來憇足應悟世身輕

臨平湖

在鎮東南五里一名鼎湖一名東湖一名東江湖有四閘周十里許

浦闊奮飛龍潭深治忽通僧扉連苻綠隄鷺逐霞紅

灌溉懷居易清漣篤褚公湖源今赤否寶鼎幾重隆

月華菴 里人沈聖清叔義

在鎮北一里宋咸淳九年俞氏捨地建精舍又名悲花菴有靈鑑塔其南為李菴十笏菴

施地結祇園經過鳥亂喧溪雲當晝洩野衲向宵繁

舍利明蘿塔天花繞梵軒坐深忘妙界竹裏聽潺湲

白龍廟 里人徐剛振安民

在鎮西臨平山上初有室女感電光而孕產一白蛇有異僧至曰此白龍神托胎也祝之即躍入盂中捧至山巔水洞從此靈驗大著宋時載在祀典淳祐七年大旱禱雨有應理宗遣使降香寶祐五年苦雨禱晴復應更命增剏一門以旌之六年旱復應禱碑版尚存

白龍遺往蹟野老僅傳聞苔澗泉聲落藤垣鳥路分

山高寒抱日屋冷暗生雲欲共留吟處空林水葉紛

瓶山

里人梅調鼎 修子

在鎮中宋時沽官酒處

積土旗亭傍偏宜候月明有寮供木佛無酒出盞罌

地轉人家列山低雲樹清滄桑悲往事幾度釀新成

藕花洲

里人應大觀 我生

臨平記附錄

七

在鎮西三里宋僧參寥有詩東坡為書刻石宗婦曹夫人者善丹青遂作臨平藕花圖其上為趙氏洲居引清別業

幽徑攬平蕪芳洲擬雪膚雲飛斜澗疾山入亂烟孤

舊社磨題刻新吟感畫圖誰憐今杜若輞水寫花姑

曲竹塢

勞鳴謙 荀日

在鎮西二里安隱寺西唐邱丹隱處後羽化去棄杖于此生竹皆曲咸可為杖其種至今不絕宋林次麟有詩

仙人垂老去舉袂便遺筇鳩節疑來鳳虬枝不化龍

泉聲曲自合露彩翠多重何日洪厓過相扶到九峯

桐扣山

里人沈聖旭 輔升

在鎮西十里晉武帝時臨平岸崩出一石鼓
推之無聲帝以問張華華曰可取蜀中桐材
刻爲魚形扣之則鳴矣于是如其言果聲聞
數里天啟中僧大掄建石鼓亭其下卽石鼓
湖

石鼓知何處蒼茫萬壑秋風雲迷虎穴松竹抱僧樓

清咏增幽興憑高亦壯遊今來誰博物欲問已悠悠

龍興寺

在鎮中宋宣和七年因東湖水溢建菴鎮厭
名曰妙華紹興六年高宗以太后駕幸本寺
特賜今額

古寺開南宋函湖勢已分斷鐘沈戍火陰殿落山雲

估舶晴溪集農謠遠岸聞轉思遊幸日紫蓋結龍文

臨平記附錄

八

丁姥冢

里人沈聖昭 弘宣

在鎮西十里桐扣山東
漢丁蘭母葬此名姥山

丁墓西山裏蒼蒼一望孤夜臺空落月神路有啼烏

黃草愁心切低雲淚眼枯九原不可作刻木感吾徒

時昭丁
內艱

桂芳橋

里人沈廣震 武定

在鎮中舊名茅橋宋時里人徐宣與弟寅垓
同太學數十人伏闕上書攻賈似道後同登
進士垓居榜首鄉人號曰一門三秀更今
名元大德九年重建其北爲余東江草堂

市橋遺故宅耆舊已曾聞齒出重湖雨欄看遠岫雲

土風猶朴略兵燹尙紛紜憑弔吾曹在晴川又夕曛

廣嚴寺

里人釋智潤雲濤

在鎮中晉時建唐玄覽法師隱此嘗請寺前平湖通洲為放生池開元二十三年集賢學士徐安貞撰碑初名華嚴寺宋治平中改今額紹興初高宗召寺僧淨作草書淨書名花傾國一詩以諷因賜罷

烟雨前朝寺巍然丹碧居水香浮貝葉花綻映金渠
松憩玄公錫碑橫隋氏書千年興廢跡祖道慨秋餘

臨平三十詠 有引

里人潘雲赤夏球

風烈烈兮山嶽欹樛枝合兮猿晝啼思古人兮澹忘
歸浩歌發兮悲歛歔翹首兮白日拊心兮俱馳龍蜿
蜿兮水湯湯山雲滃兮雁南翔舉桂枝兮無路奚搔

臨平記附錄

九

首兮增我傷

臨平蕞爾地乃有可詠者三十而詠之者三十亦甚
盛矣人文媲美一覽神往予筆舌蹇澀欲吐不能竟
置不可強作東婦之顰詎免續貂之誚若云是有別
思則非予本志也前次次其齒茲編次其地聊為遊
觀者一助云

臨平湖

石函久蕪沒龍鬪失雌雄湖水無今古堪嗟霸業空

讀書堆

龍戲野臺下讀書野臺上沙深臺已空懷古獨悲愴

龍興寺

寺外官橋迥僧歸野樹蒼翠華獨不見湖水日湯湯
永和塘

龍潭龍已飛沙路雲時黑車馬日奔馳臨歧羨矯翼
桂芳橋

彩虹飲南川沙雨赤欄外桂枝今若何市煙漫青靄
廣嚴寺

晉室遺茲構飛甍大道斜雨花迷市火擊磬對鳴笳
瓶山

宋氏酒誰釀人今月其遊山成瓶已罄應不似糟邱
臨平記附錄

明因寺

陰殿青楓合跣趺有女師隨人宣梵頃不復掃蛾眉
石筍

曲隄慎衝瀉遺甃不知春別有桑麻境何當來問津
黃犢嶺

何處尋黃犢空山多白雲鳥還鐘磬寂風葉暮紛紛
塔址

邱山山上塔零落幾經秋日月懸相抱登臨起暮愁
劔池

懷哉武肅王礪劔拂霜雪霸氣慨自今斗間尙明滅

細礪洞

古洞青蘿合蒼山白日寒
愁來看越砥劒蒯向誰彈
白龍廟

谷風日夜號蘿燭祠孤聳
殘碣抱晴霓歸雲通繡栱
月華菴

蕭森水精域旭日到西山
詩罷逢支遁雲流心自閒
景星觀

丹室巖阿裏陰森碧樹交
鶴鳴泉泠泠縹緲下雲旂
曲竹塢

山雨時作喧曲竹翠巖裏
披襟挹清風慷慨不可止
臨平記附錄

安隱寺

雲裏燭花紅安平啟梵宮
泠泠愛泉檻獨坐響松風
安平泉

白雲敞風泉裊裊俯天闕
漣漪清我心祇樹搖晴月
寶幢

淨域寒幢湧澄波動七層
摩挲一秉燭谿路日雲蒸
藕花洲

菡萏映芳洲動影西山際
香生五里風圖失千年麗
像光湖

湖白千峯月鐘清隔岸歌
葦煙漁獨宿僧飯鳥羣過

丁姥塚

古墓含斜月玄猿號夜臺孝思永以則溪壑至今哀

桐扣山

博雅羨司空拳蘿石如虎鼓生幽壑雲山截重湖雨

淨慧寺

羣山開化域鐘靜水淙淙不愁黃鶴雨久已毒龍降

甘露泉

寺古雙峯落簷低一水生茂陵雖久渴不必望金莖

渥洼泉

名泉藏梵宇光怪映斜暉神龍不可見雲裏一僧歸

臨平記附錄

十一

向上庵

蘭若深逾靜登遊媿昔賢空山一鐘發竹裏住流泉

大安寺

花梵逼陰嶺到來塵氣銷龍蟠知呪水仰見白雲飄

冰谷泉

探源北岑下竹日澹幽襟寒光浮綠玉細響散瑤琴

臨平記附錄終